

新疆图志

新  
華  
書  
局



新疆圖志卷一百十三

人物一

土著

謹案新疆爲西域故地而漢唐以來三十六國之中與中國相通最早者爲伊吾爲高昌爲于闐爲車師爲輝和爾爲衛拉特交通既近往來較多其間人物尙可徵諸史乘而得之其餘湮沒不彰者蓋不可勝紀也茲先列乎土著以別乎流寓云

昔班書叙古今人物表考論先哲其後晉人常璩撰華陽國志因襲斯體爲士女志二卷所以彰微闡幽者厥例大備然必有所徵信而後能永其傳故孔子曰夏禮吾能言之祀不足徵也殷禮吾能言之宋不足徵也文獻足則能徵夫西域戎翟之地騎射之俗自漢唐以來二千餘年文教闕寂無得而稱而山川奇偉之氣發皇震盪魁桀之士武力之臣攀鱗附翼亦往往崛起於其間惜乎簡冊流傳代不數人其沉淹磨滅者迺至不可勝數豈非荒裔之

外無文字傳記以垂諸久遠歟而軼事遺聞間有存者其亦有幸  
有不幸歟今甄采史傳補綴舊文著之於篇然而忠臣烈士節女  
義夫湮沒而無傳者猶十之五六也嗚呼可勝慨哉

漢

堂邑奴甘父故胡人也善射從張騫使西域行時百餘人爲匈奴  
所拘留後潛行凡歷大宛大月氏大夏康居十三歲窮急時射  
禽獸以給食堂邑父得還漢封堂邑父爲奉使君

蔡昧大宛貴人也初漢使至宛者昧卽以禮相待武帝聞大宛產  
汗血馬心好之使壯士持千金以請大宛善馬宛不肯予漢使  
怒妄言而去宛貴人怒曰漢使輕我遣郁成王遮殺漢使武帝  
怒遣李廣利伐宛道遠食乏士多道斃不利後益發戍甲卒十  
餘萬復伐之比漢兵至宛敗其軍進圍宛城宛貴人恐殺其王  
出善馬令漢自擇廣利取善馬三千匹擇宛貴人之賢者而立  
之蔡昧故時與漢善因立爲大宛王與盟而還

昆莫難兜靡子也月氏攻殺難兜靡奪其地人衆亡走匈奴子昆莫初生其傅布就翎侯抱亡置草中爲求食還見狼乳之又烏銜肉翔其旁以爲神遂持歸匈奴單于愛養之及壯以其父民衆與之使將兵數有功時大月氏已爲匈奴所破昆莫自請單于求復父仇遂西攻破月氏月氏西走徙大夏地昆莫畧其衆因留居兵稍強會單于死昆莫不肯復朝事匈奴匈奴遣兵擊之不勝益以爲神而遠之漢後以公主妻昆莫使東居烏孫故地遂爲烏孫國王

莎車王延於元帝世嘗爲侍子於京師慕樂中國及王莽之亂匈奴略有西域惟延不肯附屬嘗謂諸子曰當世奉漢家不可負也  
莎車王康延太子也嗣位後率傍國拒匈奴擁衛故都護吏士妻子千餘口檄書河西問中國動靜竇融乃承制立康爲漢莎車建功懷德王西域大都尉五十五國皆屬焉



莎車王賢於建武十七年復遣子奉獻請都護帝賜賢西域都護印綬及車旗黃金錦繡當世榮之

尉屠耆樓蘭王子初爲質於漢傅介子既刺殺樓蘭王安立尉屠耆爲王可刻印章賜以宮女爲夫人備車騎輜重丞相率百官送至橫門外祖而遣之王自請曰國中有伊循城其土肥美願漢遣一將屯田積穀令得依其威重漢乃遣吏士以鎮撫之更名其國爲鄯善

唐

阿史那社爾東突厥處羅可汗名俟利弗失之次子也貞觀十四年以交阿道行軍總管平高昌諸將咸受賞社爾以未奉詔秋毫不敢取太宗美其廉賜高昌產鈿刀雜綵千段詔檢校北門左屯營封畢國公二十一年以崑邱道行軍大總管與契苾何力郭孝恪楊弘禮李海岸等五名軍發鐵勒十三部及突厥騎十萬討龜茲師次西突厥擊處密處真敗之入自焉耆西兵出

不意龜茲震恐進屯磧石伊州刺史韓威以千騎先進右驍衛將軍曹繼叔次之至多禍城其王率衆五萬拒戰威與繼叔合殊死戰大破之社爾因拔都城王輕騎遁社爾留孝恪等守之自率精騎追躡行六百里王據大撥換城嬰險自固社爾攻凡四十日入之擒其王并下五大城遣左衛郎將權祇甫徇諸酋長示禍福降者七十餘城宣諭威信莫不歎服刻石紀功而還因說于闐王入朝王獻馬畜三百餉軍西突厥焉耆安國皆爭犒師孝恪之在軍也牀帷器用多設金玉以遺社爾社爾不受帝聞曰二將優劣不復問人矣帝崩請以身殉衛陵高宗不許遷右衛大將軍永徽六年卒贈輔國大將軍并州都督陪葬昭陵治冢象葱山諡曰元

契苾何力鐵勒歌楞易勿施莫賀可汗之孫貞觀十四年爲葱山道副大總管討高昌平之始何力母姑臧夫人與弟沙門在涼州沙門爲賀蘭都督十六年詔何力往祝母薛延陁毗伽可汗

方強契苾諸酋爭附之乃脅其母弟使從何力驚謂其下曰上與爾有大恩且遇我厚何遽反皆曰可敦都督去矣尙何顧何力曰弟往傳足矣我以義許國不可行衆執之至毗伽牙下何力箕踞拔佩刀東向呼曰有唐烈士受辱賊廷耶天地日月鑒臨吾志卽割左耳示不屈毗伽怒欲殺之其妻諫而止何力之被執也或讒之帝曰何力入延陁如涸魚得水其脫必遽帝曰不然若人心如鐵石殆不背我會使至言狀帝泣下卽詔兵部侍郎崔敦禮持節許延陁尙公主因求何力乃得還授右驍衛大將軍公主行有日何力陳不可帝曰天子無戲言旣許之可奈何何力曰禮有親迎宜詔毗伽身到京師或詣靈武彼畏我必不來不來則姻不成而憂憤不知所出下必携貳不及一年交相疑沮毗伽素很戾不死死則二子爭國內叛反携貳不戰而擒矣帝從之毗伽果不敢迎抑鬱不得志恚而死少子拔酌殺其庶兄突利失自立國中亂如其策云後以崑邱道總管平



龜茲

莫賀達于突騎施酋長也開元二十六年突騎施殺其可汗蘇祿  
二十七年八月乙亥磧西節度使羞嘉運招突騎施于賀邏嶺  
戰其可汗吐火仙二十八年立那史那昕爲十姓可汗莫賀達  
于聞之怒曰平蘇祿我功也令立昕詔何遂誘諸部以叛詔羞  
嘉運招諭以莫賀達于爲突騎施可汗已而昕竟爲莫賀達于  
所殺西突厥遂亡復安西節度使夫蒙靈祭討莫賀達于斬之  
突騎施亦漸衰

哥舒翰西突厥首領哥舒部之裔也父道元爲安西都護將軍赤  
水軍使故仍居安西翰少讀春秋識大義初從節度使王倕倕  
攻沂城使翰經畧稍知名後王忠嗣署爲牙將遷左衛郎將吐  
蕃寇邊翰每出戰持半段槍迎擊所向輒披靡名蓋軍中擢右  
武衛將軍爲河源軍使天寶中封西平郡王子暉字子明德宗  
詔曰爾父開元中朝廷無西憂令得卿亦不東慮遷河南尹

尉遲勝于闐王珪之長子也天寶中入朝獻名玉良馬元宗嘉之妻以宗室女授右衛將軍與安西節度使高仙芝擊破薩毗播仙以功加銀青光祿大夫至德初聞安祿山反乃命弟曜行國事自將兵五千赴難國人固留不聽卒以少女爲質而行肅宗待之甚厚授特進兼殿中監廣德中拜驃騎大將軍于闐王令還國勝固請留宿衛加開府儀同三司封五都王勝請以本國王授曜詔從之勝乃於京師修行里盛飾林亭以待賓客建中從行奉天兼御史中丞貞元初曜遣使上疏言勝旣讓國請傳子勝又固辭且言曰曜久行國事人皆悅服銳生京華不習國俗不可遣當是時兄弟讓國人多賢之卒贈涼州都督

石演芬西域人李懷光畜爲假子懷光與朱泚通謀演芬使客部成義詣行在言懷光無破賊意請罷其總統成義走告懷光懷光召演芬罵曰爾爲我子奈何欲破吾家今日負我宜卽死對曰天子以公爲股肱公以我爲腹心公負天子我安得不負公

且我胡人惟知事一人苟免賊名而死死甘心矣懷光使左右  
嚮食之皆曰烈士也可令速死以刃其頸事聞贈兵部尙書斬  
成義於朔方

史大奈本西突厥特勒

特勒即鐵勒鐵勒突厥可汗庭即今烏魯木齊地

隋大業間歸中國從征遼東

有功拜金紫光祿大夫分其部落於樓煩會唐高祖舉兵大奈

率衆以從敗隋將於飲馬泉從太宗討薛舉平王世充竇建德

劉黑闥有功賜姓史封竇國公

新唐書本傳並文獻通考突厥傳

裴玢疏勒人先世本疏勒王初爲鄜坊牙將節度使王栖曜卒中  
軍將何朝宗作亂玢搶以待命詔斬之擢玢司馬踰年授節度  
使徙山南西道爲治嚴稜遠勢利不務朝貢疏食敝衣居處取  
避風雨而已倉庫充實百姓安之當世將帥無有及者卒諡節

新唐書本傳

朱邪執宜系出西域突厥唐德宗時其父朱邪盡忠居北庭之金  
滿州吐蕃破北庭徙之甘州乃悉衆三萬部落歸唐吐蕃追之



盡忠道戰死執宜集餘衆歛靈州塞詔以爲山陰兵馬使使率  
所從李希朝鎮太原料其勁卒號沙陀軍天子伐鎮州以兵七  
百爲前鋒敗王承宗衆數萬蔡州之役攻拔凌雲柵累官代北  
行營招討使子赤心官振武節度使賜姓名李國昌即晉王克

用父也

五代史後唐本紀

白孝德安西人

唐時安西在塔里木東

事光弼爲偏裨史思明攻河陽使驍將劉龍

仙挑戰加右足馬鬣上嫚罵光弼光弼使孝德斬其首以還後  
累功至北庭行營節度使

遼

科里裕悅回部人太宗會同四年三月特授回鶻使并賜旌旗弓

劍衣馬有差

哈喇準布酋長太宗會同四年九月命爲本部額爾奇木

赫魯世穆宗乳媪之兄也應歷二年六月命爲阿克蘇錫林額爾

奇木

托歡和珍回鶻安進吐蕃都圖皆諸部酋長也統和七年自宋歸  
創來皆賜衣帶

濟喇準布酋長也太平六年討回鶻阿爾斯蘭部徵兵諸路獨濟  
喇後至立斬以徇是謀自立而限於力者

蕭罕嘉努字糾堅納喇部人嘗言準布諸部自來有之太祖西征  
至於流沙準布望風悉降西域諸國皆願入貢統和間出師西  
域拓土既遠降服亦衆自後一部或叛鄰部伐之使同力相制  
正得馭遠人之道

金

馬慶祥字瑞甯本名蘇爾濟蘇先世自西域入居臨洮以馬爲氏  
後徙家淨州天山歷官鳳翔府路兵馬都統管判官元光元年  
與元兵戰於澮水兵敗被執不屈死

元

巴哩珠阿勒坦德濟伊都呼者高昌國主號也先世居輝和爾之

地自布克漢為之君長傳三十餘世至伊嚕勒德濟數與唐人相攻戰於是唐以金蓮公主妻其子格呼勒德濟居和琳伯哩伊嚕勒德濟卒又數傳遷交州歷九百七十餘載而至巴哩珠阿勒坦德濟臣於契丹聞太祖興朔方遂殺契丹所置監國等官欲來附未行帝遣使使其國伊都呼大喜即遣使入奏曰臣聞皇帝威德即棄契丹舊好方將通誠不自意天使降臨下國自今而後願率部眾為臣妾遂以金帛入貢辛未朝帝於吉魯爾阿奏曰陛下若恩顧臣使臣得與陛下諸子之末庶幾竭犬馬之力帝感其言使尚公主伊埒鄂端且得與於諸子與哲伯納延征哈瑪爾蘇坦回回諸國將部曲萬餘人紀律嚴明所向克捷又從帝征尼沙布爾並阿西皆有大功既卒次子諤古埒濟德濟嗣

哈蘇納原作哈散納奇雅納氏原作法烈亦太祖時從征王漢有功命同飲班珠

爾河之水且曰與我共飲此水者世為我用後管領諤爾根軍



從太祖征西域下賽瑪爾堪布哈爾等城至太宗時仍命領諤爾根軍後以疾卒子訥古伯襲從憲宗攻釣魚山有功卒後子薩題勒密實襲薩題勒密實卒子茂巴爾襲充桂齊千戶遷西域親軍副都指揮使

阿喇勒烏蘇回鶻巴鄂爾氏仕其國爲千夫長太祖征西域駐蹕巴鄂爾之地阿喇勒烏蘇率其部曲來降從帝親征旣破瀚海軍又攻輪臺高昌于闐塔什干等靡戰不克後卒於軍中

塔本伊吾廬人人以其好揚人善稱之曰揚公屢從太祖征伐軍士有妄殺者必戒之鎮興平地經兵燹民無生意乃召父老問所苦悉爲除之盜李仙等作亂止誅首惡宥其誣誤卒諡忠武追封涼國公子阿爾濟蘇特穆爾

元史本傳

阿爾濟蘇特穆爾嗣父職爲興平等處行省都元帥爲治一遵先政興學養士輕徭薄賦雖同僚不敢干以私役一民從大軍伐高麗有功卒諡武襄子阿勒台

阿勒台爲平灤路達嚕噶齊請減鹽酒等稅細民不征置甲乙籍以籍民力民甚便之進懷遠大將軍歲饑發粟賑民全活甚衆僚屬始至必餽鹽米牲器曰非有他欲其不剝民耳姻族貧者日有常給民或不能葬則資助之灤爲孤竹故國乃廟祀夷齊勵風俗焉卒賜忠亮子德呼威蘇

德呼威蘇延祐間爲河間路總管屬歲饑出俸金及庫儲賑之活數十萬人河間當水陸要衢供億勞費立法調遣民皆稱便復建言增置便習弓馬尉一人益選兵之數於是盜賊屏息陵州羣兇爲民害悉收繫死獄中遷遼陽行省參知政事子索約勒哈默色

索約勒哈默色爲監察御史時詔起大利於京西壽安山與同列上章極諫言東作方始而興大役以耗財病民非所以祈福會治書御史索諾木以夙怨嫉臺諫密譖於上殺之泰定初追封郡公諡貞愍

哈勒噶齊必嚕輝和爾人也性聰敏習事國王約蘇特穆爾伊都呼聞其名自錫哩瑪勒國徵爲斷事官約蘇特穆爾卒子巴哩珠阿勒坦德濟伊都呼年幼西遼主珠爾漢遣使據其國且召哈勒噶齊必嚕至則以爲諸子巴哩珠阿勒坦德濟聞太祖明與其子伊德實伊納克馳歸太祖大悅卽令諸皇子受學焉仍令伊德實伊納克以質子入宿衛從帝西征至巴實伯里東獨山尺城空無人帝問此河山對曰獨山城往歲大饑民皆徙他所然此地當北來要衝宜耕種以爲備臣昔在錫哩瑪勒國有戶六十願徙居此帝曰善遣伊德實伊納克佩金符往取之子皆留居焉後六年太祖西征還察田野墾闢民物繁庶大悅問哈勒噶齊必嚕則已死矣乃賜伊德實伊納克都督印兼獨山城達嚕噶齊

塔塔圖該輝和爾人也性聰慧善言論深通本國文字奈曼迪延漢尊之爲傅命掌金印及錢穀事太祖西征奈曼國亡塔塔圖



該懷印逃俄就擒帝詰之曰迪延漢人民疆土悉歸於我汝負  
印何之對曰將以死守欲求故主授之耳安有他帝曰忠孝人  
也問是印何用對曰出納錢穀委任人材一切事皆用之以爲  
信驗耳帝善之命居左右嗣後凡有制旨始用印章仍命掌之  
又命教太子諸王以輝和爾文字圖書太宗卽位仍掌內府玉  
璽金帛命其妻烏赫哩氏爲皇子哈喇徹爾乳母時加賜予塔  
塔圖該召諸子諭曰上以汝母鞠育太子賜予甚厚當先供太  
子用有餘則可分受帝聞之謂侍臣曰塔塔圖該以朕所賜先  
供太子其廉介可知矣由是數加禮遇以疾卒至大元年贈中  
奉大夫追封雁門郡公

伊爾特穆爾回鶻人輝和爾國相多伊克裔也兄必里克布哈年  
十六襲國相達爾罕時西契丹方強威制輝和爾命太師僧沙  
克嘉臨其國驕恣用權奢淫自奉輝和爾王患之謀於必里克  
布哈對曰能殺沙克嘉挈吾衆歸蒙古彼且震駭矣遂率衆圍

沙克嘉斬之以功加號必里克呼爾敦進授妻門必濟號和斯德勒有疾其功者譖於王曰沙克嘉珥珠先王寶也必里克布哈匿之盍急索勿失其王怒索寶甚急必里克布哈度無以自明乃亡附太祖賜以金虎符以弟伊爾特穆爾爲質必里克布哈卒伊爾特穆爾從太祖征討多立戰功皇弟特穆爾鄂綽克求師傅帝命伊爾特穆爾往訓導諸王子以孝弟敦睦仁厚不殺爲先帝聞而嘉之

莽吉蘇輝和爾人世居巴實伯里古北庭都護地幼有奇質年十五盡通本國書太祖聞之召至闕下一見大悅曰此兒目中有火他日可大用以授睿宗使視顯懿莊聖皇后分邑歲賦復事世祖於潛藩日見親用憲宗崩莽吉蘇言於世祖曰神器不可久曠太祖嫡孫惟王最長且賢宜卽皇帝位諸王塔齊爾伊遜克哈坦等咸是其言世祖卽位眷顧益重至元四年卒年六十

有二

博囉哈雅輝和爾人也祖伊勒必哈雅父濟達哈雅俱以功爲其國世臣博囉哈雅幼孤就學舅氏通本國字書尤精騎射年十八隨其主內附充宿衛太祖西征博囉哈雅扈從不避勞苦帝嘉其勤以吉嚕漢女舒穆魯氏配之太祖崩諸王來會選使燕京總理財幣還莊聖太后聞其廉謹求之於太宗凡中宮軍民匠戶之在燕京中山者悉命統之授眞定路達嚕噶齊辛卯歲拜燕南諸路廉訪使旋授斷事官使職如故時斷事官得專生殺多倚勢作威而博囉哈雅小心謹密慎於用刑有誤毆人死者吏治以重罪其子號泣請貸死博囉哈雅戒吏使擒於市懼則殺之至則不懼乃曰誤毆人死情有可宥子而能孝義無可誅遂併釋之使出銀以資葬埋且呼死者家諭之其人樂從俄遷順德等路宣諭使至元二年卒年九十六性孝友造大宅於燕京自輝和爾國迎母來事之得祿不入私室幼時叔父阿勒巴哈雅欺之盡有其產及貴築室宅旁迎阿勒巴哈雅居之弟



伊特格森哈雅以宿憾爲言毫不爲動帝賞賜以大府綾絹等物弟求四之一納其國賦盡與之無吝色初拜廉訪使命下之日子希憲適生喜曰吾聞古以官爲姓天其以廉爲吾姓乎故子孫皆姓廉後有奏廉氏仕進者多宜稍汰世祖曰博囉哈雅功多子孫亦朕所知大德初贈儀同三司大司徒追封魏國公諡孝懿

廉希憲字善甫博囉哈雅子也初侍世祖於藩邸一日方讀書聞召急懷孟子以進世祖問讀何書對曰孟子問其說以性善仁義保民致王之旨對世祖嘉之稱爲廉孟子世祖卽位遂大用得展其濟世之才西定秦隴東靖齊魯北安遼碣南撫荆湖在中書六年以王道贊襄當時翕然稱治帝嘗命受國師戒對曰臣受孔子戒矣帝曰孔子亦有戒耶對曰爲臣當忠爲子當孝孔子之戒如是而已卒諡文正追封魏國公晉贈恒陽王子六人孚恪恂忱恒惇並顯仕丞相史天澤曰廉公宰相中眞宰相

男子中真男子人以爲名論云

本傳及神道碑

廉希賢字達甫伯父博囉哈雅嘗曰是兒剛果必大吾家至元初北部王拘殺使者奉命往諭之至則布上意詞旨條暢王悔謝十二年春授禮部尙書持國書使宋至獨松關爲守者所戕明

年宋亡執仇人張儒殺之詔護其喪歸

元史本傳

廉和斯哈雅字公亮希憲從子幼孤言及父輒泣下居母喪哀毀踰禮護喪渡江值風濤作仰天悲呼風遽止嗣登進士第同知順州提舉滿速勒奪民田同列畏其勢和斯哈雅案治之不少縱拜監察御史大臣有貪猥狼籍者亢章劾之遷都水監疏會通河隄灤漆二水又修東京閘歷秘書丞上疏諫迎佛骨謂費財蠹俗時躡其言擢河南行省右丞會有詔發民治決河屬郡騷然數上書言不便時宰不能用而天下多故矣終翰林學士承旨知制誥前後凡三入史館

元史本傳

徹伯爾和卓賽音人賽音西域部之族長也因以爲氏和卓其官

稱也徹伯爾長身美髯雄勇善騎射初謁太祖於軍中一見異之太祖與克哂王漢有隙一夕王漢潛兵來攻倉卒不爲備軍大潰太祖引去從行者僅十九人徹伯爾與焉至班珠爾河餓糧俱盡荒遠無所得食會一野馬北來諸王哈扎爾射之殪遂煮而啖之太祖舉首仰天而誓曰使我克定大業當與諸人同甘苦苟渝此言有如河水將士莫不感泣王漢旣滅西域諸部次第亦平

扎哈齊哩克台氏以軍伍長從太祖同飲班珠爾河水庚午從征奈曼有功賜良馬一壬申從征庫楚克諸國復賜珍珠旗佩金虎符旣而得西域織金綺紋工三百戶命扎哈世掌焉

和斯摩哩西域古則鄂爾多人太祖西征和斯摩哩率哈三等城酋長迎降大將哲伯以聞帝命和斯摩哩從哲伯爲先鋒攻奈曼克之斬其主庫楚類哲伯令和斯摩哩持庫楚類首往徇其地若喀什噶爾葉爾羌鄂端諸城望風降附又從征尼沙布爾



城諭下之帝親征至賽馬爾堪與其主扎拉鼎合戰於卓勒新濟齊之地再戰於圖滿山追至漢顏城西寨皆大敗之扎拉鼎逃入於海和斯摩哩收其珍寶以還取伊嚕格勒德沁兩城繼而漢顏城亦下帝遣使趣哲伯疾馳以討欽察命和斯摩哩招諭奇爾台實喀喇烏蘇等城悉降至庫爾哲部又阿克蘇部以兵拒敵皆戰敗而降又招降赫林城進擊俄羅斯於塔勒山克之獲其國主密濟特薩勒哲伯命和斯摩哩獻諸卓沁太子斬之尋征喀喇至伯資巴里城與主呼圖克薩哈勒戰又敗其軍遂平欽察軍還哲伯卒帝以和斯摩哩從軍西域宣力居多命長子諾綽巴襲爲懷孟達嚕噶齊

蘇爾約蘇圖和琳輝和爾人仕其國爲烏魯謬齊太祖時與父來歸從征回回國還事睿宗於潛邸睿宗分眞定地以爲本路斷事官子巴勒巴事世祖爲博囉齊鷹房萬戶又從裕宗北征至扎哈尼嚕古命歸守眞定未幾命行省揚州巴勒巴辭曰臣自

幼未嘗去陛下願侍左右改隆興府達嚕噶齊遙授中書右丞  
達實高昌人有謀略爲國人所推服太祖西征高昌國主懼召達  
實與謀達實知天命有歸勸其主納降稱臣以安其國由是號  
爲尙書子伊拉齊

伊拉齊驍勇善戰所將部落又强大太祖班師諸王勸帝招之太  
祖是其議詔給驛馬五百迎與俱來既至甚器重之太祖西征  
伊拉齊別從親王阿齊台與敵戰有功甚見親遇王嘗以絳蓋  
障日坐聞伊拉齊奏事稱善久之既退撤其蓋送之十里遂兼  
長四環衛之筆且齊後從大軍伐金戰功日多子特爾格齊

特爾格齊伊拉齊長子也沈篤有才至元中爲德府達嚕噶齊適  
士人蔡知府據城叛特爾格齊冒矢石先登身被數創力戰平  
之主將將屠城特爾格齊曰叛者蔡知府數人耳城中何預焉  
豈可濫及無辜主將感其誠懇城獲全時軍興簿檄急特爾格  
齊以國書記之無遺失者帝甚嘉焉官至嘉議大夫婺州路達

新編國志  
嚕噶齊封國公子雅爾堅雅里

雅爾堅雅里至元間以中書省宣諭使使河南適汴鄭大疫命所  
在村郭構廬舍備醫藥以畜病者全活甚衆又承中書檄徵考  
上都儲峙及還帝賜錦衣貂裘以旌其能終湖南路達嚕噶齊  
子海壽

海壽官杭州路達嚕噶齊招復流民甚著恩惠封范陽郡侯諡惠  
敏

鄂扎克齊姓嘉納氏克實密爾人與弟納摩俱學浮屠氏兄弟相  
謂曰世道擾攘吾國將亡東北有天子氣盍往歸之乃偕入見  
太宗禮遇之太宗師事納摩以鄂扎克齊佩金符奉使省民瘼  
憲宗尊納摩爲國師授玉印總天下釋教鄂托克齊亦費用事  
領克實密爾萬戶奏曰克實密爾西陲小國尙未臣服請往諭  
之詔偕近侍以往其國主不從怒而殺之帝爲發兵誅國主元  
貞元年年封代國公諡忠達



薩奇蘇回鶻人其國阿塔都督托果斯之次子也初爲太祖弟烏珍筆且齊領王傳世祖卽位授北京宣撫遷經略統軍二使兼益都路達魯噶齊卒年六十六贈安邊經遠宣惠功臣

巴哩珠阿勒坦高昌國王也聞太祖起朔方遣使入奏願率所部爲臣僕來朝尙公主奉命征哈瑪爾蘇勒坦回回諸國紀律嚴明所向克捷從帝征泥沙布爾征河西並有功孫和爾齊哈喇和爾齊哈喇至元十二年都勒幹率衆十二萬圍火州和爾齊哈喇曰吾聞忠臣不事二君吾生以此城爲家死以此城爲墓終不能從彼也圍六月未解敵射書城中索其女謂從則解去不然且急攻和爾齊哈喇曰吾何愛一女而不以救民命乃以茵載女縋城下與之圍遂解後入朝帝嘉其功妻以公主錫鈔十萬錠賑其民還屯哈密海都兵忽至率所部與戰力盡死之子

### 納琳

納琳詣闕請兵北征以復父仇時年尙幼帝壯其志賜金帛數萬

妻以公主會吐蕃亂詔爲宣慰司領本部兵往鎮之威德明信賊用斂迹仁宗稽實錄封爲高昌王別賜金印子特穆爾布哈特穆爾布哈父夢請以王爵讓其叔奇徹台叔力辭乃嗣爲高昌王泰宣中拜平章政事行省湖廣文宗召還京師佐平大難時湖南左丞有嫉媚害政者詔誅之乃爲申請曰是誠有罪然罪不至死人服其雅量官至中書左丞相讓其弟齊奇襲王爵哈噶斯阿蘇特氏主阿克蘇國太宗兵至其境哈噶斯率衆來降賜名巴圖爾錫以金符命領其土尋奉旨選克蘇軍千人及其長子阿都齊扈駕親往旣還阿都齊人直宿衛哈噶斯還國道遇敵人戰歿救其妻威穆蘇領兵守國威穆蘇躬擐甲胄平叛亂後以次阿法布代之世祖至元十一年命阿法布之子拜達勒錫千戶佩金符時錫里濟叛詔拜達勒領阿克蘇軍一千往征之與昂吉爾珠爾噶岱軍戰於雅里復與永和爾戰於圖喇及鄂勒歡之地十五年春至巴雅爾之地與策凌軍合戰五月

駐兵額哩頁與威喇台溫綽格色等軍合戰其大將塔斯布哈樹木爲柵積石爲城以拒大軍拜達勒督勇士先登拔之達勒矢中右股伯楞奇默色以其功聞授虎符定遠大將軍後衛親軍都指揮使兼阿克蘇軍充阿克蘇巴圖達嚕噶齊廿二年征巴實伯里軍於伊拉袞綽和爾之地與托噶博索瑪軍戰有功二十六年征抗愛敵勢甚盛大軍乏食其母諾延章輸已帑及畜牧等給軍食世祖聞而嘉之賜予甚厚大德四年拜達勒卒實保輝和爾人父吉勒伯格齊智勇過人聞太祖北征領兵來歸從征回回國數立功將重賞之自請爲本國古魯城達嚕噶齊從之仍賜種田戶三百卒實保事世祖潛邸命長筆且齊中統元年以爲眞定路達嚕噶齊改戶部尙書

伊勒濟呼濟哈雅輝和爾人中統三年呼圖克暨達里叛領兵平之至元十二年佩虎符爲隴右河西道提刑按察使烏魯斯呼爾實雅謀亂從皇子安西王往鎮之十七年進嘉議大夫仍居



舊職二十年進中奉大夫四川等處行中書省參知政事尋以疾卒追封威甯郡公

阿錫貢西域佛哩人通諸部語工星歷醫藥二司後改廣惠司仍命長之至元十三年奉詔使西北崇王鄂勒歡所還拜同平章政事固辭擢秘書監領宗福使大德元年授平章政事

巴延

原作伯顏

蒙古巴林部人曾祖蘇嚕克圖事太祖爲巴林部左千戶

祖阿拉襲職兼斷事官父舒庫爾台世其官從宗王錫里庫開西域巴延長於西域至元初錫里庫遣入奏事世祖見其貌偉聽其言厲曰非諸侯王臣也其留事朕與謀國事恒出廷臣右世祖益賢之敕以中書右丞相安圖女妻之若曰爲巴延婦不慚爾氏矣二年七月拜光祿大夫中書左丞相諸曹白事有難決者徐以一二語決之衆服曰眞宰輔也四年改中書右丞七年遷同知樞密院事十一年大舉伐宋與史天澤並拜中書左丞相

伊克穆蘇輝和爾人也至元二年入備宿衛屢使絕域以榮祿大夫平章政事爲集賢院使兼會同館事卒封吳國公

郭羅洛納新系出西北郭囉洛因以爲氏元時色目人散處天下故納新居鄞縣以薦授翰林編修天才宏富於元好問爲近所著有金臺集河朔訪古記

齊齊克輝和爾人性至孝侍親不願仕以祖蔭讓其叔父

元史孝友傳

伊蘇岱爾喀喇人父阿勒巴巴雅濟呼太祖時率衆來歸以五十戶從軍南征戰死伊蘇岱爾世其官從丞相巴延征宋有功進懷遠大將軍管萬戶東征日本全軍而還移鎮秦州籍民丁爲兵得萬人以爲欽察親軍指揮使統之大德元年以疾卒

巴勒巴輝和爾人事世祖從征哈喇章征額爾布格均以功膺賞賜命行省揚州辭曰臣自幼未嘗去陛下願侍左右改隆興府達魯噶齊遙兼中書右丞諭之曰是朕舊居地汝往治之卒後贈司徒子四人皆仕季子琳沁官中書平章政事有政績

元史本傳

雅爾鼐輝和爾氏集賢大學士圖烈子也仁宗奉興聖太后出居懷州從者多懷去志雅爾鼐獨無所畏難成宗崩勸仁宗入定大計迎立武宗累官侍御史兼將作院使閩有繡工工官大集民間婦女居肆督責吏因爲奸雅爾鼐奏罷之閩人感悅仁宗卽位拜中書平章政事請召舊臣咨朝政又請以中都苑囿還諸民其於國家事有不便者知無不言言無不納然韜晦隱密不洩於外卒贈趙國公諡忠敬

阿爾哈雅事武宗仁宗與兄雅爾鼐並見信任入侍帷幄共踐省闈者十餘載在廷無間言至治初出爲平章政事歷鎮江浙湖廣河南陝西皆有惠政文宗入承大統復命鎮汴時改元之詔傳播未徧羣藩猶懷窺覲陝西官府結連靖安王等起兵東擊潼關破虎牢掠鄧州賴阿爾哈雅徵兵時糧部署素定又疏請降詔招諭大致脅從註誤始得解散難平乃丐西人釋俘虜凡數千人陝西官吏被獲者皆遣還官終中書平章政事



貝降北庭人弱冠從丞相阿珠南伐常登先陷陣爲慶元路治中屬歲大饑躬詣行省請賑民賴全活蘭溪州民葉一王十四有美田宅鄉宦范某欲奪之不可因誣以事繫獄十年貝降至釋葉王而置范於理州民咸快焉遷浙東廉訪使同寅有貪賄者悉劾免之終工部尙書諡貞惠

唐仁祖字壽卿輝和爾人性穎悟早孤母教之讀書通方言尤邃音律中統初詔諸貴胄爲質帝親閱之見仁祖曰是唐古直孫耶聰明無疑也俾習國字至元六年官至翰林學士贊善大夫知制誥兼修國史以疾卒年五十三贈榮祿大夫平章政事

喇卜丹回回氏西域茂薩里人至元八年世祖遣使徵礮匠於宗王額呼布格王以喇卜丹伊斯瑪音應詔二人舉家至京師給以官舍首造大礮豎於五門前命試之各賜衣段

諤爾根薩里輝和爾人通曉經史初宿衛內朝有告宋宗室反者逮捕之使已發趣入諫謂言者必妄江南初定不宜以浮言謀

動人心帝立召使者還械言者下郡治之果得仇誣狀擢朝列大夫勸帝用儒術治天下又請優給國學廩餼拜平章政事因北京地震請罷徵利司以塞天變詔下之日天下皆相慶成宗立召對不名嘗語之曰朕昔在潛邸誰不願事朕者卿雖召不至今乃知真得大臣體追封趙國公諡文定子三人長岳柱岳柱字兼山官江西行省平章政事有告富民負永甯王官帑者中書遣使徵之使至江西岳柱以事涉誣罔不奉令僚佐重宰執意岳柱曰民爲邦本傷本歛怨亦非宰相福也使者復命中書聞言感悟詰治得實罪誣告者桂陽人張思孝等嘯聚二千人宣諭司使發兵往捕岳柱不可曰有司不能撫綏民乃欲興兵以害民耶遣人諧賊巢諭以禍福賊曰致我爲非者兩巡檢司耳我輩何敢有異心諭使復業一方以甯性寬恕人欺之不介意或問之則曰彼自煩也我何與焉

伊瑀圖巴爾阿克蘇人嘗出獵遇虎於隘張吻欲噬乃以手探虎

挾其舌拔佩刀刺殺之憲宗立阿克蘇軍使領其衆數從征伐以功授本軍千戶後從大軍南征宋將洪福既降復叛以計乘醉殺之子約幹實

約幹實阿克蘇人襲父職爲阿克蘇軍千戶珠爾噶岱叛率所部兵擊之至和囉噶圖擒其將實喇徹爾斬於軍其衆悉平諸王和琳等叛從皇子北安王討之至鄂勒歡河無舟躍馬涉流而渡俘獲甚衆時北安王方戰失利陷敵陣中約幹實從諸王永和爾追敵至金山王乃得脫歸賜金虎符進定遠大將軍前衛親軍都指揮使

額森爾輝和爾人幼事世祖於潛邸從征有功官至陝西行省平章政事謝事歸隴右十年卒

托里實克輝和爾人襲父職爲武德將軍羅羅斯副都元帥同知宣慰司事屢征有功入覲授三珠虎符加懷遠大將軍羅羅斯宣慰使兼管萬戶後入覲卒於京師



塔喇齊喀喇人也事世祖屢從征討以功加鎮國上將軍三珠虎符廣西兩江道宣慰使都元帥金瘡發卒追封臨郡公

烏魯斯喀喇氏曾祖哈斯巴延國初時歛附爲莊聖太后牧官祖海都從憲宗攻釣魚山歿於陣父莽賚特穆爾世祖時爲筆且齊後爲太府少監烏魯斯當至元十九年爲內府筆且齊二十一年封監察御史遷雲南行省理問領雲南王府事二十八年平楊都要等九月進中奉大夫賜虎符大德六年授通奉大夫羅羅斯宣慰使兼管萬戶進正奉大夫至大二年召還以瘴癘臥病不起皇慶二年卒年五十六贈光祿大夫益國公

嘉魯克蕭達實輝和爾人通天齋教及諸國語翰林承旨安藏扎薦達實於世祖召入朝命與國師講法國師西番人言語不通帝因命嘉魯克蕭達實從國師習其法及言與字期年皆通以輝和爾字譯西天番經論進之帝命鑄板賜諸王大臣西南小國星噶爾德威二十餘種來朝嘉魯克蕭達實於帝前敷奏其

表章諸國驚服成宗卽位遷榮祿大夫大司徒憐其老命乘輿入殿仁宗卽位議汰冗官獨嘉魯克爾達實爲司徒如故仍加開府儀同三司是年八月卒

明安喀喇氏至元二十年授定遠大將軍中衛親軍都指揮使明年賜佩虎符領桂齊軍北征又明年立桂齊軍都指揮使司命爲本衛達嚕噶齊二十九年以功陞定遠大將軍桂齊軍都指揮使司達嚕噶齊大德二年復將兵北征與海都戰七年歿於軍

阿寶克布哈喀喇國王族也初太祖拔喀喇時其祖母臧密古瑪里氏新寡有二子曰庫魯克曰雅雅皆幼以國破無依遂驅駝負子至京師帝命有司治邸舍具廩餼以居焉居二年聞國中已定謁帝欲歸帝曰汝昔何爲而來今何爲而去且問其所欲對曰臣妾昔以國亂無主而歸陛下今聞國已定欲歸守墳墓耳妾惟二子雖愚無知願留事陛下帝大喜立召二子入宿衛

而禮遣之後十三年復來則二子已從憲宗伐蜀矣庫魯克無子雅雅後封康王生六子阿實克布哈最賢年十四入侍世祖會西番遣使者有所奏請既諭遣之後數日帝問近侍諸大臣曰前日西使何請朕何辭以遣諸大臣莫能對阿實克布哈從旁代帝甚詳帝因怒諸大臣曰卿等任天下之重反不如一童子也後事武宗見帝顏色日悴乃進曰八珍之味不知御萬金之身不知愛而麴蘖是耽姬嬪是娛如雙斧伐孤樹未有不顛倒者也帝大悅曰非卿孰爲朕忠言自今毋愛於言朕不忘也至大二年十月薨于位年四十七贈純誠一德正憲保大功臣中書右丞相追封順甯王諡忠烈

察罕西或巴喇勒哈城人父布都訥歲庚辰國兵下西域舉族來歸贈榮祿大夫宣徽使察罕魁偉穎悟博覽強記通諸國字書爲行軍府鄂囉千戶鄂囉齊參政至元二十四年從鎮南王征安南師次瀘江安南世子遣其叔父詣軍門自陳無罪王命察



罕數其罪而責之二十八年授樞密院經歷皇慶元年進榮祿大夫平章政事乞歸解州立碑先塋許之暮年居德安白雲山別墅以白雲自號嘗入覲帝望見曰白雲先生來也其被寵遇如此帝嘗問張良何如人對曰佐高帝興漢功成身退賢者也因范仲淹所撰碑詞甚熟帝歎息良久曰察罕博學如此也常以病請告歸里帝曰知足不辱今見其人

必嚕匝納實哩北地瑪拉國人幼熟輝和爾及西天書長能貫通三藏及諸國語大德六年奉旨從帝師受戒於廣寒殿代帝出家更賜今名皇慶中命繙譯諸梵經典延祐間特賜銀印及光祿大夫

呼魯蘇巴哩勒都氏曾祖博勒和罕札事太祖從平諸國充巴勒喇實千戶祖蘇爾台年十五能騎射以勇略稱從征欽察爲千戶領兵下西番父昂吉爾岱初爲軍器監官奉旨使西域籍地產悉得其實帝方欲大用之而卒呼魯蘇初直宿衛後以千戶

從征納延馳馬奮戈衝擊敵營矢下如雨身被三十餘創成宗親督左右出其鏃令醫療之以其功聞後以千戶從皇子庫庫楚出征還留鎮軍中以功授榮祿大夫司徒賜銀印

托里哈雅輝和爾氏世居巴實伯里曾祖庫克布色埒濟當太祖西征導其主伊都呼迎降帝壯其識欲官之辭以不敏祖巴喇珠始徙眞定仕至帥府鎮撫富而好施或貸不償則火其券人稱爲長者父齊哩克齊性純正知讀書托里哈雅幼嗜學警敏絕人性整暇雖居倉卒未嘗見其急遽至治三年遷淮東宣慰使七月卒贈通奉大夫

徹爾特穆爾阿嚕威氏祖父累立戰功爲西域大族徹爾特穆爾幼沉毅有大志早備宿衛擢中書直省舍人遂拜監察御史天歷二年拜中書右丞尋升中書平章政事黃河清有司以爲瑞請聞於朝徹爾特穆爾曰吾知爲忠臣爲孝子天下百姓安爲瑞餘何益於治至元元年拜中書平章政事

博羅特穆爾字國賓高昌人以江東廉訪副使選爲襄陽路達魯噶齊順帝十一年奉行省檄援穀城與賊相持及襄陽失守乃率衆二百人且戰且退遇沔陽府達魯噶齊耀珠等因糾合義兵破賊於陽湖港又敗諸潛江縣會賊大至力戰抵暮身被數創麾從子瑪哈實哩使去曰吾以死許國汝毋留此從子泣曰生死從叔父旣而被執賊請回爲逆怒罵之遂遇害從子率家奴求其屍復與賊戰均歿於陣舉家死者三十六人

布琳尼敦北庭人官山南廉訪使按臨所部威惠翕然至正十二年寇犯中興以兵禦之射殺甚多賊稍却明日賊復擁衆襲東門與之戰被執不屈死

巴延布哈德齊字蒼崖輝和爾氏駙馬都尉中書令丞相高昌王舒穆德濟之孫駙馬都尉浙江行省丞相荆南王多喇德濟之子也性倜儻好學曉音律歷官至江東道廉訪使至正十八年陳友諒遣賊黨王奉國寇信州巴延布哈擊走之後數日賊復



來攻奮擊大破之幾擒奉國陳友德繞城樹木柵攻益急又遣  
叛人高義來誘降巴延布哈數其罪而斬之由是日夜與賊鏖  
戰糧竭矢盡氣不少衰拒守五閱月至殺老弱爲食士疲不能  
戰萬戶奎瑪里以城降遂自刎諡桓敏

沁布阿咱爾字子仁高昌人官監察御史劾權相旺嘉奴十罪出  
爲贛州路達魯噶齊摘奸發伏一郡肅然至正十八年陳友諒  
遣其將辛文才率兵圍贛使脅之降沁布阿咱爾斬脅降使日  
擐甲胄登陴拒守凡四閱月將士疲不能支萬戶某欲舉城降  
遂自刎諡儆哀

察罕特穆爾字廷瑞北庭人幼篤學慨然有當世之志至正間汝  
穎盜起察罕奮義起兵平晉冀泰山東諸盜拜中書平章政事  
知河南山東樞密院事陝西行台中丞爲王士誠所刺贈推誠  
定遠宣忠亮節功臣開府儀同三司上柱國左丞相封忠襄王  
阿都齊阿蘇特氏父哈噶氏主阿克蘇國太宗兵至其境率衆迎

降阿都齊扈駕親征還直宿衛從征西川征額呼布格征李璫  
登先陷陣嘗矢中腹不懼至元五年同布達台領兵南征攻破  
金剛臺從攻安慶府下松江諸郡有功戍鎮巢爲宋將洪福所  
害世祖憫其死厚恤其家子拜達勒

拜達勒襲職千戶時錫里濟叛詔領阿克蘇軍千人從征至額里  
頁敵樹木爲柵積石爲城以拒拜達勒督勇士先登拔之以功  
授定遠大將軍充阿克蘇巴圖達嚕噶齊復從征巴實伯里征  
愛抗皆有功征愛抗時敵軍甚盛大軍乏食其母諾延章輸已  
帑及畜牧給軍世祖聞而嘉之賜予甚厚

道通高昌人自號石巖性沉默寡言以世胄入官歷官清要素負  
能名加大司徒後守撫州城陷爲陳友諒兵所害諡忠烈

達爾瑪高昌人歷官至河南行省右丞改翰林學士承旨遷陝西  
行台中承年六十九致仕全俸優養終身

阿史那社爾突厥處羅了漢之子也年十一以智畧聞處羅可汗

爲拓設建牙於磧北頡利亡西突厥亦亂社爾詐往降之襲取其地幾半有衆十餘萬乃曰破我國者薛延陁也我當先可汗報讐擊滅之諸部皆諫社爾不從遂擊之

明

吳允誠蒙古人居甘肅塞外塔溝地永樂三年率其部落五千因宋日成來歸自是降附日衆邊境日安由允誠始七年往亦集覘敵擒哈喇等二十餘人進都督同知明年出塞敗本雅失里與中官王安追闕脫赤至把力河獲之封恭順伯

李英西番人洪武中歸附成祖末年中官喬來喜鄧成等使西域道遇賊見殺掠所齎金帛仁宗敕英與上官指揮康春等進討遂率兵西入賊驚走追擊踰崑崙山深入數百里遇賊大敗之毛忠西陲人祖拜都征哈密戰歿父寶鏡勇充總旗忠襲職時年二十膂力過人正統三年從都督蔣貴征朶兒只伯先登陷陣大獲十一年從總兵官任禮收捕沙州衛都督喃歌部落徙之



塞內進都指揮使

國朝

達什策楞本厄魯特宰桑歸順後授散秩大臣將軍兆惠攻霍集  
占命與侍衛滿綽爾圖等率百人捉生口爲賊所遮力戰被執  
不屈賊鈎其手足數日乃死

敕照陣亡例賜卹滿綽爾圖別有傳

玉努斯喀什噶爾回部郡王道光六年張格爾之亂隨參贊慶祥  
辦理軍務城陷死之照提督例議卹

愛馬特庫車回部郡王同治三年五月回變帶兵拒賊力戰陣亡  
敕照例議卹

伯錫爾哈密回部郡王先世自康熙三十七年編旗世効忠順同  
治三年秋漢回焚掠關廂戕把總高萬清城幾不守伯錫爾率  
纏回奮擊賊始西竄四年西路賊陷漢城請巴里坤兵復之傾  
家財以給兵餉復饋糧濟巴城饑軍五年冬賊大舉犯境官兵

敗於柳樹泉伯錫爾遣人齎印幣赴巴城乞援而自禦賊於頭堡力戰被執賊詰請兵狀瞋目唾罵曰欲盡滅狗黨耳手奪矛刺二賊斃遂遇害時年七十餘賊割伯克夏斯林耳鼻數日始殺之碎骨颺灰焉事聞贈封親王建祠哈密以夏斯林阿克都拉巴海附祀

阿布都爾滿葉爾羌阿奇木伯克也道光六年張格爾之亂副將永貴以兵一千六百人赴明約洛禦之全軍敗沒葉爾羌辦事大臣璧昌召諸伯克諭以禍福協力守城分兵防科熱巴特巴爾楚克諸要隘回兵屯回漢兩城之關官兵屯東門外賊馬步萬餘來撲我兵極力擊之賊衆潰走是戰也阿奇木伯克布都爾滿之力居多

詔授副都統銜

薩拉爾準夷舊宰桑也知達瓦齊將亡攜其部衆歸順乾隆二十一年平準之役以右副將軍協贊戎機屢立戰功伊犁定後

詔授二等超勇伯

濟爾噶爾都爾伯特部中驍傑也乾隆二十一二三年間平回準二部戰功最多

詔授領隊大臣副都統

霍集斯回部中王族也以擒獻達瓦齊功賜爵郡王黑水之圍佐將軍兆惠堅守頗著勞績

鄂對回部傑出之英也將軍兆惠平伊犁時歸附圍攻庫車鄂對備知賊中形勢以告將軍敗其援賊後守和闐被圍三月困守孤城與噶布舒極力扞禦以待援師

詔授貝子銜

鄂齊爾與扎薩爾回部人也持稍一呼千賊披靡克定回部頗著勞績

詔授內大臣圖形紫光閣

阿玉錫厄魯特部人也乾隆二十年平伊犁達瓦齊退保格登山



阿玉錫率二十餘人間道夜襲其後諸賊大潰達瓦齊率數百騎遁降萬餘人

詔授散秩大臣喀喇巴圖魯

達什策凌衛拉特部人也額駙策凌受創達什策凌衛護以出圍  
暗啞叱咤千人辟易以功

詔授散秩大臣騎都尉

玉當素筠冲望族也能通回情既納六城

詔授內大臣哈密郡王移鎮烏什

阿什默特烏什右族也乾隆二十三年將軍兆惠移師西征阿什默特負弩從戎往收和闐風鶴之時孤城兀守以功

詔授回部公和闐阿奇木伯克

噶爾默特回族也軍門再款願効前驅出入諸艱終始一節以功

詔授回部公喀什噶爾阿奇木伯克

禡木特達瓦齊舊宰桑也守札哈沁勇健異常策凌歸順禡木特

追攔直入卡塘不及而退邊臣知其勇以計誘而擒之乾隆十  
九年阿睦爾撒納來降福木特悉其狡詐陳言彼雖歸附心乃  
豺狼二十年伊犁定達瓦齊就擒以阿睦爾撒納爲雙親王兼  
左副將軍與將軍班第同駐伊犁阿睦爾撒納煽誘諸部果叛  
時福木特以養痾他適聞變急赴又無兵衛手刃三賊力盡馬  
僵被執見阿逆不屈唾其面撒納怒縊死之奉

旨賜卹贈都統

李廷舉昌吉拔貢官陝西扶風訓導生平言笑不苟事母以孝聞  
母歿水漿不入口者數日廬於墓服闋乃歸同治三年罵賊不  
屈被害子成章舉鄉試武科亦剛正人謂忠節之報

連登甲鎮西人歲貢生僑寓古城授徒直回亂携眷走匿南山賊  
酋安得璘聞其名遣人敦迫爲記室登甲謂家人曰吾讀聖賢  
書肯從賊作入幕賓乎仰藥而死

黃某奇台貢生佚其名官陝西延川教諭本回族也子震邑附生

同治間逆賊陷城舉家殉難

王朝貴古城回民家巨富長子廉援例爲太學生同治間叛回脅令從逆朝貴堅執不可遣次子棟避難乃積薪於室驅合家十餘口焚之己亦赴火死

舒泰庫爾喀喇烏蘇北鄉車排子鄉約同治三年之亂倡團保境旋奉檄入城助剿奮不顧身累戰皆捷復戰於五道橋力屈被執厲聲罵賊釘其手足於窗數日乃死

王秉正迪化武舉同治三年六月與義民吳敖徐學敏俱以送糧濟軍遇賊戰死

李得興呼圖壁人同治三年六月督鄉團擊賊被執支解之李殿魁古城人於賊圍攻時竭力助守城陷力戰死之閱數日戚屬入城棺斂顏色如生其母妻先投井死

楊寅楊存兄弟也俱身康義民同治之亂縣令裕厚札令帶勇防堵城陷裕厚逃寅存舉家殉難同時死事者有外委楊福春云



安三安四俱呼圖壁人性毫俠不事產業以樗蒲爲生庸俗多輕之同治三年六月十二日叛回陷烏魯木齊十三日下昌吉諸路聞風逃竄城邑幾空賊前旗至呼拒賊里許城中員弁皆潛匿市人倉卒不知所向二人集好義者十二人指天瀝血誓以必死相與掉臂奮往遇回騎於道徒手相格回衆披靡會後旗虜至以鎗矛攢刺之二人肉袒奮呼與諸義民盡力搏擊創甚猶不少懈賊後至者益衆遂與十二人俱遇害至今言回事者猶嘖嘖於十二人不置云

張和奇臺人集鄉里健兒殺賊自成一隊名與孔才捋同治四年秋與賊戰於濟木薩殲賊四五百以功保藍翎六品銜五年秋與巴里坤兵復奇臺古城濟木薩三城六年復哈密遂駐防哈密之三堡明年西路賊大股犯境拒戰力不支死之和戰功最著未蒙叙錄遽死論者悲之

李恒秀奇臺附生捐貲練團與賊遇於小屯戰死

徐學義迪化義民驍勇善戰與其兄學功練團抗賊賊深憚之同

治十一年與帕夏戰於迪化城南中礮陣亡

密之三聖四年四月...

與巴里世兵...

...

...

...

...

...

...

...

...

...

新疆圖志卷一百十四

人物二

流寓

謹按流寓而附諸人物古無此例也惟新疆地處邊荒自漢唐以來除出征將士遷謫流人蹤跡恒不到此是以窮蒐史冊卓卓可傳者代不數人專作一編竟難成帙爰附諸人物之後而以上著流寓相輔而行庶免簡單之狀焉閱者諒之

史遷伯夷列傳云伯夷叔齊得孔子而益彰言幸有人傳述也然考夷齊軼事稱述至今者多在去國以後西山窮餓之時卽孔子亦以半生客寄聞名諸侯自古傳人無溫飽家居不出里閭者豈不然哉豈不然哉新疆自漢始通彼時都護有生還之望翁主作愁思之歌固自古視爲羈旅之鄉也迨至

本朝例處謫宦其間名人碩士多寄跡於荒涼寂寞之區而流風餘韻轉得父老傳述遠夷稱道往往歷百數十年猶嘖嘖於人口



烏乎身後之名有幸有不幸如是者其幸耶其不幸耶茲網羅古  
今得若干人載之簡冊庶幾不朽云爾

上古

黃帝居於崑崙之墟

商

彭祖姓彭名鏤顓頊之元孫善養性歷商周年七百六十而不衰

嘗流寓西域百有餘年後仕商為守藏吏仕周為柱下史

論語疏及神仙傳

周

李耳字聃久居西域相傳于闐國城西有比摩寺是老子化胡成

佛之所

漢

張騫建元中以郎應募與堂邑甘奴父使西域月氏十三載還漢

拜騫為大中大夫拜堂邑父為奉使君元朔六年騫以校尉從

將軍出擊匈奴迺封騫為博望侯後使烏孫與烏孫使數十人

來報謝拜騫爲大竹

李陵廣之孫也天漢二年陵擊匈奴至凌稽山遇匈奴三萬騎殺數千人軍無後援矢盡糧竭敗降匈奴單于以女妻陵立爲右較王與衛律俱貴用事今哈密城東十餘里馬驥山望鄉嶺相傳是李陵題字處

郅支單于自以道遠又恐謹擁護呼韓邪而不助已困辱從使者江刀始等遣使求侍子漢議遣衛司馬谷去送之復爲所殺自知負漢又聞呼韓邪日強恐見襲擊會康居遣使迎之妻以女甚尊敬之欲倚其威郅支數擊烏孫至赤谷城烏孫西邊東虛不居者五十里

蔡愔仕漢爲郎中孝明帝八年奉命之天竺求佛經居久之立白馬寺於雍關西邊

竇固仕漢爲奉車都尉明帝十六年奉命出酒泉郡破呼衍王於天山留屯伊吾盧城

甘英爲定遠侯班超掾時西域五十餘國悉內屬其條支安息蒙  
奇兜勒四萬里外皆重譯貢獻超乃遣英窮臨西海凡前世所  
不至山經所未詳一切山川氣節物類人風莫不備寫情形傳  
爲珍怪焉

後漢書

晉

段業京兆人爲苻秦將呂光參軍從攻龜茲入其城見宮室壯麗

作龜茲宮賦以譏之

十六國春秋

魏

韓安保於太和三十一年高昌王馬儒表求內徙高祖納之遣韓  
安保赴之割伊吾五百里以儒居之

隋

薛世雄爲玉門道行軍大將孤軍渡磧初伊吾謂隋軍不能至皆  
不設備及聞世雄兵已渡磧大懼請降世雄遂於伊吾城東築

城曰新伊吾



裴矩使西域自敦煌至西海其道有三南道從鄯善今焉海于闐今和

朱俱波今英吉沙爾喝盤陀今色勒庫爾度葱嶺達西海即漢時南道中道從高昌今吐

焉耆今喀喇沙爾龜茲今庫車疏勒今喀什度葱嶺達西海即漢時北道今之南路北道從伊吾

密今哈密經蒲類海今巴里坤鐵勒部突厥可汗庭在今烏魯木齊地渡河北流今通化西行至伊寧水皆北流

佛林國即漢時條支唐書以為大秦國非也今為如德亞國達於海即今北路又按愛烏罕為漢大月氏再西為默克等部海即地中海

王威隋銀青光祿大夫也從薛世雄軍渡磧降伊吾世雄乃築新

伊吾城留威以甲兵守之

唐

岑參以詩鳴名得李杜初辟磧西節度幕府途中有赴北庭度隴

思家詩公餘吟詠有晚泊蒲類等詩後官嘉州刺史世稱其詩

為嘉州體

杜環杜佑族子天寶中安西副都護高仙芝表為幕僚從攻勃律

仙芝凱旋環獨歷遊至西海寶應初乘商舶自廣州還撰經行

記一卷唐書

契苾何力母姑臧夫人與弟沙門在涼州沙門爲賀蘭都督十六年詔何力往視母薛延陀毗伽可汗方強契苾請諸酋附之乃脅其母弟使從何力驚謂其下曰上於爾有大恩且遇我厚何遽反皆曰可敦都督去矣尙何顧何力曰弟往侍足矣我義許國不可行衆執之至毗伽牙下何力箕踞拔佩刀東向呼曰有唐烈士受辱賊庭邪天地日月臨鑒無志卽割左耳示不屈毗伽怒欲殺之其妻諫而止何力被執也或讒之帝曰何力入延陀如涸魚得水其脫必遽帝曰不然若人心如鐵石殆不背我會使至言狀帝泣下卽詔兵部侍郎崔敦禮持節許延陀尙公主因求何力乃得還

### 五代

供奉官張匡業於天福二年于闐國王李天聖遣使馬繼榮來貢晉遣匡業假鴻臚卿彰武節度判官高居誨爲判官册李天聖爲大寶于闐國王是歲冬十二月匡業等自靈州行二歲至于

闐七年冬乃還

五代史西域傳

晉

楊宣為沙州刺史疆理西域宣以部將張植為前鋒所向披靡軍

次焉耆焉耆王熙拒戰於賁崙城西進屯鐵門未至十餘里熙

又率眾要之於遮留谷植將至或曰谷名遮留恐有伏焉單騎

嘗之果有伏發植擊敗之進據尉犁

晉西戎傳

匡鄰西行人仲雲界

仲雲在沙州西其牙殿居胡盧磧小月支之遺種也

漢明帝時征匈奴屯田於伊吾

盧蓋其地也

宋

王延德使高昌歷伊州州將陳氏其先自唐開元二年領州凡數

十世唐時詔敕尙在次歷益都次歷納職城在大患鬼魅磧之

東南望玉門關甚近

元

萬戶綦公直至元十八年戍巴什伯里自大和嶺至巴什伯里置



新站二十年立巴什伯里和州等處宣尉司二十三年遣侍衛  
新附兵千人屯田巴什伯里置元帥府卽其地以總之

明

主事肯徹洪武二十四年命肯徹使西域以書諭吟第爾和卓成  
祖卽位之冬遣官齎璽書綵幣使其國

李達於永樂六年齎敕往喀什噶爾國王至卽奉命十年遣使入  
貢方物

指揮劉福天順七年奉命使喀什噶爾其貢使亦不能常至  
國朝

法海字淵若漢軍正藍旗人忠勇公佟國綱次子也由翰林檢討  
累官兵部尙書性伉直權貴多嫉焉雍正四年坐事發西陲水  
利處效力在戍屢臥土室中枯寂如老僧及見王公大帥動以  
義相責皆人所不敢言者九年

召還乾隆元年賞給副都統銜管理咸安宮事務旋卒

先正  
串略

吳士功河南光州人由臺練洊歷疆圻多所建白其疏草略見皇朝奏議中乾隆二十六年巡撫福建坐事發巴里坤效力明年捐資贖罪歸漢明臣傳

畢沅字纓衡一字秋帆江蘇鎮洋人乾隆二十五年進士廷對第一授修撰嘗以甘肅道員從總督出嘉峪關察看屯田自木壘河至濟木薩往還數千里途中多紀行詠古之作後官兩湖總

督有靈巖山人詩文集

先正事略

紀昀字曉嵐河間獻縣人由編修洊擢侍讀學士乾隆戊子坐漏洩運使盧見曾事謫戍烏魯木齊有烏魯木齊雜詩百六十首藉瑣事以寓勸懲深合風人旨趣辛卯

召還官至禮部尚書協辦大學士諡文達生平貫徹儒籍通達政體爲一代碩儒名臣云

先正事略及文達集

曹麟閣安徽貴池人官湖北黃梅知縣乾隆四十六年緣事戍烏

魯木齊有塞上竹枝詞新疆紀事詩數十首爲時傳誦

三州縣志

周恭先字素芳一字平山湖南新化人乾隆丙戌進士選雲南建水知縣有富人犯羅宜抵而讞已定將出之矣恭先至閱讞牘曰是不宜出吏挾前令畫稿固爭則力斥之其夜囚家懷重金求緩竣卻之持益力因盡駁前讞問如律大府劾以故入人罪遣戍烏魯木齊在戍吟詠自適所爲詩斂才鍊氣醞釀深醇雖遭意外貶斥而無激烈譙殺之音其所養有非尋常所及者閱十年始釋歸歸後躬耕自給足跡不履城市學者稱平山先生

沅湘耆舊集

吳熊光字槐江江蘇昭文人官兩廣總督以英吉利兵船寄內洋未調兵驅逐逮問戍伊犁著有伊江別錄紀所見聞滿漢名人言行多後進未聞者逾年

特旨召還授武選司主事尋乞病回籍道光戊子重宴鹿鳴加

四品卿銜

先正  
事略

洪亮吉字稚存陽湖人乾隆庚戌進士第二人及第嘉慶元年以



咸安宮官學總裁官乞病歸瀕行上書成親王及各當軸言時事語多狂直成親王以聞落職謫伊犁明年京師旱減釋軍流不雨出安西南黎氏二臣於獄又不雨乃

手詔赦亮吉是日沛然雨御製得雨詩有亮吉原書無違礙句並將其書製潢成卷視若良規

聖主之容直臣超越前古而亮吉諒節實亦上格天心云在戍不及百日著有萬里荷戈集天山客話二編既歸自號更生居

士先正  
學略

海起雲烏魯木齊參將也言昔征烏什時戰罷還營見崖下樹樞間一人探首外窺疑爲間諜奮矛刺之中石上火光激迸矛折臂幾損疑爲目眩然矛上地上皆有血迹不知何怪紀昀曰此必山精也深山大澤何所不育乎節錄因  
微草堂

伍彌泰前烏魯木齊將軍也烏魯木齊城西有深林老木參雲蔭

蔚彌互數十里中有小湖彌泰於湖邊建一亭曰秀野亭節錄因  
微草堂

御史觀成與紀在烏魯木齊將軍幕軍吏具文牒數十紙捧墨請  
判曰凡客死於此者其棺歸籍例給牒否則魂不得入關以行  
於冥司故不用朱判其印亦以墨昫視其文鄙誕殊甚以爲此  
胥役託詞取錢耳啟將軍除其例句日後或告城西墟墓中鬼  
哭無牒不得歸昫斥其妄又數日或告鬼哭已近城斥之如故  
又幾日昫所居牆外魏魏有聲昫謂成曰余向以爲胥役所僞  
爲近數日鬼哭已至窗外矣成曰公所持理正雖將軍不能奪  
也然鬼哭實所共聞不得照者恐亦怨公盍試一給之倘鬼仍  
如故則公益有詞矣勉從其議後竟寂然

韋佩金字友山江都人積學能詩由進士選廣西知縣嘉慶四年  
以貽誤軍情發伊犁効力楊芳燦芙蓉山館文鈔有送其出關

駢文序傾佩甚至其爲名流心折如此

芙蓉山館集  
並三州雜錄

宋吉祿軍吏也在印房忽瞑仆久而後蘇云見其母至俄台軍以  
官牒呈視則哈密報吉祿之母來視其子卒於哈密途次

李鑾宣字石農靜樂人官雲南提刑使嘉慶十二年緣事謫迪化州有荷戈集詩草陽湖惲敬爲之序賜環後官終廣東提刑使

大晏山房文集  
並三州輯略

平準噶爾時有從征將士名烏魯木齊者自言初生時其父夢見其祖語曰爾所生子當名烏魯木齊並指畫其字以示覺而不省爲何語然甚了了姑以名之不意從征至此竟久留居焉後

遷印房主事卒於官署

節錄閱  
徵革堂

孫馨祖江西萬載舉人爲閩甌甯令嘉慶間戍伊犁年近七十矣老竄窮荒猶耽吟詠有昆都侖歌爲知音所賞又爲徐松作新

### 疆賦序

方桂烏魯木齊流人子也言嘗牧馬山中一馬忽逸去躡蹤往覓隔嶺聞嘶聲甚厲尋聲至一幽谷見數物似人似獸周身鱗皴斑駁如古松髮蓬蓬如羽葆目睛突出色純白如嵌二雞卵共按馬身嘯其肉牧人多携銃自防桂故頑劣因升樹放銃物悉



入深林去馬已半軀被啖矣後不再見迄不知爲何物

李亨特官河道總督嘉慶間戍伊犁先是惠遠城在大河北岸以

柳圍給石遇漲輒壞水湫齧將及城濠亨特創築挑水土壩長

六十餘丈迎溜築掃鑲護水至掛淤衝刷之患遂息云

見松筠奏疏

顏檢字岱雲官直隸總督嘉慶十二年戍烏魯木齊歌詠適情不

戚戚於遠謫有古今體詩數十篇載三州輯略中

徐松字星伯大興人嘉慶壬申以編修謫戍奉將軍松筠檄度木

素爾嶺周視南疆而由烏魯木齊返伊犁於是以身所歷證之

簡編著爲新疆水道記西域傳補注新疆賦諸書詳覈宏麗近

世言西域者舉莫能及焉釋還後與修新疆議畧賜中書官甘

肅甯夏知府

德享郎中也因事遣戍烏魯木齊夏日散步城西至秀金亭納涼

處稍久忽聞大聲曰君可歸吾將宴客狼狽奔回告紀昀曰吾

其死乎乃白晝見鬼詳言其故昀曰無故見鬼自非佳事今在

林木深蔭之中旅櫬浮厝者不可勝數乃鬼窟也於鬼窟中見

鬼有何怪焉

節錄  
微草堂

祁韻士字鶴亭山西壽陽人官翰林編修嘉慶間戍伊犁著萬里

行程記一卷新疆要略四卷西域釋地二卷

方士淦定遠人征張格爾之役從甘督楊遇春出關戊子春由伊

犁東歸著有日記一卷紀沿途山川風物焉

田耕野統兵駐巴爾庫爾時軍士鑿井得鏡製作精妙銘字非隸

非八分似景龍鐘銘惟土蝕多剝損甚寶惜之常以自隨歿於

廣西戎幕時以授田香谷傳至香谷之孫忽失所在後有親串

弋氏於市上得之以還田氏失物復得可見物各有主也

節錄  
微草堂

林則徐字少穆福建侯官人官兩廣總督道光二十三年以征勦

洋艘獲譴戍伊犁明年將軍布彥泰奏請飭辦開墾事宜則徐

乃履勘南疆八城暨土魯番境相度川原形勢隨宜濬導水利

大興請將各城可墾荒地給無業回民承種並請改屯兵爲操

防均如議行而其溥利於無窮尤以創鑿土魯番坎水爲最土魯番爲古火州其地亘古無雨澤周禮用水作田之制無從施設則徐思得一法命於高原掘井而爲溝導井以溉田民間名之曰坎遂變赤地爲沃壤焉二十五年

召還後以欽差大臣辦理廣西軍務卒於途諡文忠生平敷歷中外勛業爛然粵東燒煙之役以功獲咎咸豐元年

特旨獎雪其忠蓋蓋久邀天鑒云

黃冕字南坡湖南長沙人由州縣洊擢監司道光中以洋務案發土魯番效力大興伊拉里克水利初林則徐創鑿坎水事未竟而賜環去土性滲漏水澤易竭冕令民以敗氈墊渠底始得灌溉優渥至今父老感念遺蹟猶稱道弗衰云

陳孚恩江西人累官兵部尙書咸豐間在籍團練力保省垣同治元年坐與載垣交往謫戍伊犁四年以協守伊犁出力

詔免罪仍留辦兵餉事宜明年正月惠遠城陷爲賊所戕



兵事一

聖清既有天下西陲恃險遠阻兵事屢見其尤大者曰平定準逆

曰平定張逆曰平定妥逆初元之亡也蒙古分爲三大部漠南蒙

古漠北喀爾喀蒙古皆成吉思汗之裔惟居西域者其後出脫歡

大師及也先瓦刺可汗是爲厄魯特一作額魯特四衛拉蒙古衛拉即瓦拉之轉音四衛

拉者卽綽羅斯特即準噶爾都爾伯特收額爾齊斯白土爾扈特收雅爾和碩特收烏魯木齊

也明末和碩特固始汗一作固實汗襲據青海率師南侵滅藏巴汗而有

其喀木之地綽羅斯特則據伊犁兼脅旁部與喀爾喀鄰尤以強

著康熙中有噶爾丹者一作噶爾且一作額爾殺其兄子索諾木阿拉布坦自

立爲博碩克圖汗性兇狡桀黠有智謀先取和碩特車臣汗女旋

襲殺其汗而兼有四衛拉復南摧回部城郭諸國威令所至覃及

衛藏乃潛謀北并喀爾喀各部自伊犁東徙帳阿爾泰山使杜爾

伯特部衆屯田且耕且牧會喀爾喀土謝圖汗執殺札薩克圖汗

而奪其妾三部內鬩我

朝使使和解噶爾丹遣其族人多爾濟札布趨覘其變故使嫚罵

土謝圖汗被殺噶爾丹揚言借俄羅斯兵復仇土謝圖汗弗之備

康熙二十七年夏噶爾丹率勁騎三萬踰杭愛山一作杭海山一作沅海山突襲其

帳豫伏刺麻千人牧其地至是應之士謝圖汗子噶爾丹台吉倉

卒拒戰敗而東走噶爾丹乘勝擊破其鄰部右翼車臣汗左翼札

薩克圖汗劫大刺麻哲卜尊丹巴一作澤卜尊丹胡圖克圖之帳於是土謝

圖等三汗部落數十萬衆棄牲畜帳幙東奔漠南乞入塞以避其

難會噶爾丹亦遣使入貢

聖祖諭令還喀爾喀侵地噶爾丹不奉

命益驕蹇徵諸屬國控弦之士至數十萬將圖大舉二十九年以

追喀爾喀為名選銳東犯沿途肆掠五月至烏爾會河一作烏爾渾一作吳兒會又

一作烏勒輝游牧記謂即今之和里河聖武記擬作烏爾佈河者誤也時尙書阿爾尼一作阿尼奉

命備邊以蒙古兵擊之令喀爾喀奪還所掠喀人務爭取陣亂噶

爾丹乘之大敗之長驅至內札薩克將入犯七月辛卯

聖武記作六月按名臣傳均作七月

聖祖下詔親征命撫遠大將軍裕親王福全爲右翼出古北口安北大將軍恭親王常甯爲左翼出喜峰口右翼兵遇賊烏朱穆沁

一作烏朱穆沁戰不利準逆南驅入烏蘭布通

上改命康親王傑書等屯歸化城邀其歸路而以右翼兵擊逆於

烏蘭布通八月己未朔我師與賊隔河而陣賊數萬騎陣山下依

林阻水以萬駝縛足臥地背加箱堦蒙溼氈環列如柵士卒伏堦

隙發矢銃備鈎距謂之駝城我師爲泥淖所阻遙以火器攻中堅

自晡至暮駝多斃且仆陣斷爲二步軍出爭先陷陣左翼兵下山

衝入遂破其壘賊衆大敗噶爾丹佯使乞和潛由潢河載木橫度

越大磧山而遁賊旣喪輜重失負駝沿途饑蹙死者殆盡惟餘數

千人還科布多

一作科卜多一作闊別列一作和卜多

是爲烏蘭布通之捷三十三年噶爾丹

復出兵侵掠喀爾喀且陰遣人誘內蒙古各部叛歸己科爾沁土

謝圖等汗以聞



上密令復書偽許內應誘之至預調士馬芻糧以待明年噶爾丹

率三萬騎入寇至哈密費揚古遣兵往禦之噶爾丹西竄圖拉河

一作土刺河一作土沿克魯倫河元史作魯連亦作魯而下侵掠至巴顏烏蘭一作巴顏

布呼懲於前敗莫敢深入三十五年二月甲午

上復親征命將軍薩布素率東三省兵出東路遏其衝大將軍費

揚古振武將軍孫思克率陝甘兵出甯夏西路截其歸路

上親統大軍出獨石口約期度瀚海三路夾攻五月次科圖時東

路軍未至費揚古等奏言沿途燬於賊宿草無存糧運復為雨阻

士馬困餒乞緩軍以待大學士伊桑阿亦力諫不聽曰朕祭告天

地宗廟以出不見賊而返何以對天下且大軍一退賊盡銳注西

路西路之軍不其殆乎遂率兵疾趨克魯倫河先遣使噶爾丹告

以駕至俟其驚擾而後乘之噶爾丹登北孟納蘭山一作孟見黃幄

龍纛軍容山立大驚而遁癸亥

上率前鋒追至拖諾一作拖山不及而還賊西奔沿途失老弱輜重費

揚古邀擊於特埒勒濟口一作特勒濟口破之費揚古曰賊雖敗而騎兵且

萬人皆百戰之卒我軍饑疲不可以逞乃遣碩岱率前鋒四百人

挑戰偽却以誘之而自率左右翼伏於昭莫多一作招莫多一作招穆多一作昭勝多一作昭木多蒙古語大樹林也即

明成祖破阿魯台地在肯特嶺之南土服之河北汗山之東為自六漠北戰場其地林木森茂北倚大山左右兩崖如削中

開平川表數里河流其間曲折環繞其南山差抵於北漸陁而下

有小山橫焉狀若馬鞍高可二十仞戰地也前軍與賊遇佯敗走

賊恃勝轉鬪將爭小山將軍孫思克先登賊蔽東崖下發礮上擊

揚古令河西兵居中滿洲蒙古兵居左右翼及戰甯夏兵千人居

左甘涼兵千人居右皆登巔以陣其右衛西安諸滿兵分列甯夏

甘涼兵左右在山下川中及南山之足而蒙古札薩克諸兵又分

列滿兵左右賊爭小山衝中堅我兵下馬發子母礮疊擊之噶爾

丹躬冒矢銃鏖戰至暮揚古遙望賊陣後一軍屹立不助戰知其

為婦女輜重也乃麾沿河伏騎一出林木中橫衝賊陣一南繞出

陣後劫其輜重賊陣亂山上軍控矢而下呼聲震天賊衆披靡墮

山者塞阮谷逐北三十餘里是役也殺賊數千級降三千餘人獲

馬駝牛羊廬帳器械無數並殫噶爾丹之妃可敦一作阿奴阿奴一作阿努水道

歷今諸載噶爾丹傳阿努乃僧格之妻噶爾丹之親僧格為七清所殺阿努乃歸於噶爾丹惟準逆將數十騎以遁時康熙三十五年

夏五月也噶爾丹既失喀爾喀地而伊犁舊巢又為兒子策妄阿

拉布坦游牧記作阿賴卜灘作策妄喇布坦西征紀略作澤旺阿喇滿坦所并自阿爾泰山以西皆非已有又連

年搆兵精銳盡喪回部青海哈薩克亦隔絕叛去窮無所歸竄翁

金一作翁錦河掠西軍餘糧為副都統祖良璧西征紀略擊敗

上乘其窮蹙諭青海諸台吉與策妄阿拉布坦協擒噶爾丹遣使

携其黨羽康熙三十六年二月丁未

上幸寧夏命馬思哈費揚古兩路進兵時噶爾丹使子塞卜騰巴

珠徵糧哈密為回人擒獻其親信諸台吉聞大兵至望風款附請

密導深入而策妄阿拉布坦亦伏兵阿爾泰山爭擒以獻功噶爾

丹進退無地旦夕將就俘仰藥死策妄阿拉布坦者僧格一作僧格桑之

次子噶爾丹之姪也初噶爾丹之殺僧格長子而據汗位也策妄



阿拉布坦偕其父舊臣七人逃居吐魯番遣使乞降

聖祖卵而翼之策妄乘噶爾丹敗劔之際潛回伊犁游牧博羅塔

拉河一作波羅塔拉河用其七友招集散亡闢地至額爾齊斯河一作喀爾喀斯河一作鄂爾濟斯河一作格爾齊斯河

遂有準部大半及噶爾丹窮蹙自盡策妄阿拉布坦奪獻其尸

求首功

聖祖畫阿爾泰山以西至伊犁為游牧地於是復成西域一大部

落策妄既有準部踵噶爾丹所為思吞并四部為一先取土爾扈

特阿玉奇汗女密間其子携衆萬五千戶至而沒入之旋阻其貢

道禁入藏熬茶阿玉奇遂率全部投俄羅斯時有和碩特之拉藏

汗者居唐古忒一作唐古特地即顧實汗一作固始特之裔也有子二長名丹衷

由唐古忒回厄魯特阿睦爾薩納妻與女旋以計殺之乃潛師入

藏襲殺拉藏汗並其次子之在青海者其杜爾伯特向從策妄分

牧額爾齊斯河久為所屬至是土爾扈特和碩特二大部落均為

所并遂自立為汗五十四年四月策妄阿拉布坦侵掠哈密

上勅西安將軍席柱甘肅提督師懿德率兵往勦富甯安總統全

軍時賊兵二千餘逼哈密城駐防哈密游擊潘至善西域圖考作潘之善名臣傳作潘之善督

綠旗兵二百擊斬賊兵九十生擒三人賊解圍潰走五月富甯安

席柱奏言吐魯番接壤哈密為準噶爾咽喉要地大兵宜駐巴里

坤從天山後烏蘭烏蘇進兵開展一作皮羅以規取吐魯番為進勦之策

上從其議富甯安尋

詔還肅州經理糧馬五十六年二月朔丙戌授富甯安靖逆將軍

駐巴里坤會同振武將軍傅爾丹副將軍祁里德一作奇里德分界備戰

六月富甯安赴烏魯木齊一作烏木齊擒回賊百六十有九獲駝馬牛羊

無算七月至畢留圖賊越山而遁乃還師五十九年七月丁卯克什圖傳

作五月富甯安進兵烏蘭烏蘇檄侍衛哲爾德克什圖阿玉錫等分道

擊擒阿克塔斯一作阿克坦斯哨卒望風竄遁奪伊勒布爾和碩谷中賊馬

百餘破所踞山隘獲台吉垂木珀爾斬賊三十餘生擒廿四人別

遣散秩大臣阿喇納一作阿爾納等諭降開展城進擊吐魯番降其酋長

十月富甯安疏稱賊窮蹙乞降爲緩兵計宜乘勝直搗其巢臣所  
統巴里坤固原甘肅兵萬有七千請以八千人出額林哈畢爾噶

一作額按  
哈畢爾噶

六千人出吐魯番阿勒輝奉

旨暫緩進勦明年春策妄遷吐魯番回人脅之行回人多中道遁  
回駐魯克齊木衆萬餘擊敗賊所遣宰桑和勒博斯額木齊兵推  
托克托馬木特爲首乞內附富甯安以

聞詔以阿喇納率兵二千駐吐魯番收撫其衆九月阿喇納奏請  
於初冬雨雪乘賊無備襲擊巡以冬寒

諭止之庚午賊犯吐魯番阿喇納使侍衛克什圖迎戰阿喇納兵  
分三隊衝擊之賊敗入林中舍騎步戰多斃於礮者盡棄軍械馬  
匹遁我兵追捕數十里捷

聞授阿喇納副將軍仍駐吐魯番六十一年二月

名臣傳作  
正月誤

詔議勦賊機宜阿喇納奏言賊進退難熟踪跡甚輕火器雖多鉛  
藥甚少我軍慮周而器備勝賊者一賊恃鎗戰少弓箭我軍鋒銛



弓勁勝賊者二賊衆臨陣易敗惟伺隙劫掠我軍部伍肅整無間  
 可乘勝賊者三賊以乘夜盜馬爲得計我軍有備賊不得入勝賊  
 者四賊侵我邊外曠地游牧我軍一至則顧戀妻子牲畜不能一  
 心迎戰勝賊者五若及時儲糧練兵以勁旅直搗伊犁則掃穴擒  
 渠其功立就惟賊徑甚多處處可以通我駐兵後路賊來一夕可  
 至若遠設汎界一被攔截消息輒阻而吐魯番屯糧之地亦須防  
 賊踐擾請移巴里坤阿爾台兩路大兵駐烏魯木齊臣等移駐附  
 近吐魯番險要之地彼此接應守護屯田並斷賊人潛襲之路其  
 進勦則兵分三路阿爾台兵由科布多沿河越額爾齊斯河巴里  
 坤兵由烏魯木齊吐魯番兵由阿勒輝一作阿勒輝口越那蘭特一作那蘭特  
喇特一作那魯特嶺賊分則易敗若一路拒戰則我以一軍奮擊兩軍直抵其  
 屯駐之地彼必不能兼顧且賊所恃爲險要者三嶺也然步行可  
 上非若棧道之難其恃以資生者牛羊乳酪也然久駐則水草無  
 多牲畜易竭雖散之勢可立而待疏下議政大臣躋其言是年進

軍烏魯木齊會哲卜尊丹巴胡圖克圖代爲請罪

上因使宣諭之令自戢漸徹西師惟於哈密巴里坤吐魯番諸處留兵防戍而已時叛賊羅卜藏丹津兵敗投歸準夷

朝廷索獻不奉

詔然亦不敢犯邊雍正五年冬策妄阿拉布坦死子噶爾丹策零立狡黠好兵如其父屢犯邊

命傅爾丹爲靖邊大將軍出北路屯阿爾泰山命岳鍾琪爲甯遠大將軍出西路屯巴里坤明年三月羅卜藏丹津謀殺噶爾丹策零事覺被執噶爾丹策零遣使奉表請獻

上諭兩大將軍來京授方略以提督紀成斌副將軍巴賽護理軍務哈密巴里坤之間有庫舍圖

一作科舍圖蒙古語謂碑爲庫舍以嶺有碑故名

牧場者當賊來路紀

成斌不設備策零潛遣騎兵二萬人乘虛劫之總兵樊廷副將冶大雄以二千兵拒戰總兵張元佐率援軍夾擊之力戰七晝夜賊始退奪回駝馬強半

詔獎樊廷降紀成斌為副將命北路副將軍查弼納馳赴西軍調

滿洲蒙古兵萬餘赴瀚海以衛內蒙古十二月傅爾丹還軍營九

年五月戊辰移營科布多六月噶爾丹策零發兵三萬令大策凌

敦多卜小策凌敦多卜一作策凌敦多卜等分領由阿爾泰山奇蘭一作奇喇犯

北路傅爾丹偕定壽一作壽馬爾薩至札克賽今圖作薩克賽河獲諜者言賊駐

察罕哈達兵不滿千距我軍三日程旋又獲偵者言博克托嶺有

賊二千駝馬萬餘傅爾丹即遣參贊蘇圖副都統岱豪等以兵三

千往勦定壽以兵千五百為援應自率大軍繼進六月己酉定壽

遇賊於庫列圖嶺一作庫列圖戰敗之斬四百餘級賊驅駝馬踰嶺遁

越一日定壽蘇圖與傅爾丹合兵一處賊兵二萬下高阜衝我營

戰却之殺千餘壬子傅爾丹以賊據險不易爭移營和通呼爾哈

淖爾一作和通呼爾哈諾一作和通淖爾定壽蘇圖及參贊覺羅海蘭副都統常祿西

彌賴一作彌據山梁之東副都統塔爾岱馬爾齊以兵二千據山梁

之西副都統承保居中策應公達福岱豪一作福率兵前驅副都統舒



楞額土默特公沙津達賴護後營甫移賊犯山梁定壽等力戰忽  
大風雨雹被圍傅爾丹遣兵救出塔爾岱遣承保援定壽圍三日  
不解常祿巴賽查弼納馬爾薩舒楞額皆戰死海蘭岱豪定壽蘇  
圖馬爾齊力竭自盡傅爾丹突圍出收集散亡得二千餘人還科  
布多時岳鍾琪在西路聞耗急使紀成斌進攻烏魯木齊以分賊  
勢賊已委城先徙矣

詔降傅爾丹爲振武將軍以順承郡王錫保代之移科布營於察

罕度爾一作察罕以馬爾賽爲撫遠大將軍屯歸化城是時準逆亦備

兵於烏魯木齊額爾齊斯河兩路九月大小策零謀乘勝東犯喀

爾喀以察汗度爾科布多皆有大軍乃取道阿爾泰山南一由大

額爾齊斯河一作華額爾齊斯一由小額爾齊斯河一作喀喇額爾齊斯小策零以精騎六千

深入大策零率衆二萬屯蘇克阿勒達以爲應兵郡王額駙策凌

與親王丹津多爾濟合兵禦之於鄂登楚勒一作鄂登楚克河遣六百騎挑

賊誘之來伏兵擊之大破其衆斬其驍將喀喇巴圖魯時議以察

罕度爾大營偏北而賊每遶山南東犯乃於推河翁金河及拜達

里克河

一作拜他里克  
一作貝德勒克

三處各築城

三河並在賽  
音諾顏部

與察罕度爾大營犄角

命馬爾賽以綏遠將軍移守拜達里克城以扼山南之衝十年七

月噶爾丹策零由北路大舉入寇繞避科布多察罕度爾大營取

道山南潛至杭愛山掠哲卜尊丹已胡圖克圖之地探知額駙策

凌軍赴木博圖山而塔密河

一作塔密爾河一作塔  
米爾河一作他米勒

為其帳所在突入襲之

盡掠子女牲畜而去策凌中途聞警斷髮誓天借諸蒙古兵二萬

反旆馳救并約順承郡王錫保會師夾攻八月己未師至額爾德

尼招

一作厄爾  
得尼招

賊逼河而陣我師夜半由間道出山後黎明呼噪而下

賊方酣飲不設備倉猝潰圍走我師追擊於喀喇森齊泊

一作克爾森齊  
老今圖作阿拉

森大戰二日賊大敗而西而西路援師竟不至策凌晝夜追擊轉

戰十餘次至鄂爾昆河

一作鄂爾坤河  
一作鄂勒坤

之杭愛山古燕然山之南麓也右

阻山左偏水道狹路險馬不並騎我兵乘暮薄險蹴之呼聲撼山

谷賊眾數萬皆覆沒以無師截擊噶爾丹策零竟越山逸去額駙

策凌急檄馬爾賽於拜達里克河邀其歸路馬爾賽擁兵觀望縱  
之去事聞

詔斬馬爾賽以徇而順承郡王亦以玩寇黜爵別以多羅平郡王  
福彭爲定邊大將軍額駙策凌副之時岳鍾琪奏巴里坤西北四  
百餘里木壘河形勢衝要宜築城屯兵二萬截賊來路與巴里坤  
大營犄角從之會賊自烏魯木齊掠哈密鍾琪遣總兵曹勳拒之  
檄將軍石雲倬等邀賊歸路於南山口雲倬等遇賊弗擊縱其飽  
颺大學士鄂容安劾鍾琪擁兵縱賊

上命大學士鄂爾泰督巡陝甘經略軍務以張廣泗護甯遠大將  
軍廣泗奏言準夷專恃騎兵我必步騎兼用而後可以制敵岳鍾  
琪主用車戰以限戎馬非獨泥古而關外砂磧之地實非所宜木  
壘界兩山中形如釜底四面受敵非駐兵之所請移軍庫舍圖嶺

旋復奏移回巴里坤並言洮賚一作洮頓一作陶頓烏克嶺一作烏可克嶺蒙古語烏

問左右偏仄境爲賊南走要路應各置兵千五百度集察罕哈瑪爾爲西

若深藏故名



來大路應各置兵千鏡兒泉噶順及烏卜圖克勒克並在巴里坤北賊或由沙磧或由北山悉可通應於鏡兒泉置兵二千噶順置兵五百烏卜圖克勒克置兵千又圖古里克特爾庫勒在巴里坤東北賊自阿濟必濟越沙磧來此爲孔道應各置兵千更於一切要隘設卡倫巡護牧廠哈密塔勒納沁亦增兵以資防守均報可十一年以查郎阿署定遠大將軍張廣泗副之查郎阿劾紀成斌曹勳疏防縱賊

詔斬以徇西路自張廣泗受任後壁壘一新屢創賊騎十二年大破賊於布隆吉

聖武記作鄂隆吉一作布朗吉爾

大坂準夷自是不敢東窺遣使請和朝

議多主進討者大學士張廷玉言且撫爲便

上奉

聖祖密諭以賊巢遼遠我師往則我勞賊師來則賊困惟有嚴兵誘致邀擊爲萬全策而賊自上年大創後已遠徙不敢深犯念兩路大兵久暴於外遂降

旨罷征遣侍郎傅鼐等報之而北路之鄂爾昆河西路之哈密皆留兵屯田防戍自是西陲稍稍乂安乾隆十年噶爾丹策零死次

子那木札爾嗣汗位童昏無行恣殺戮諸台吉攻殪之立其庶兄

刺麻達爾札一作喇嘛而大策零之孫達瓦齊小策零之子達什達瓦

則欲立其弟策妄達什準夷同族台吉以謀勇爲策妄父子兩世

將兵數有功均爲刺麻達爾札所忌及策妄達什達什達瓦以次

翦鋤達瓦齊遂與其黨阿睦爾撒納一作阿奔哈薩克阿睦爾撒納

者故拉藏汗之孫丹衷之子策妄阿拉布坦之外孫也爲人陰險

狠戾多權畧見準部內亂乃構使自訂而已乘其釁刺麻達爾札

遣台吉將兵三萬追討達瓦齊阿睦爾撒納遁歸舊部簡精銳千

五百由闐勒奇山路潛入伊犁誘其腹心爲內應襲殺刺麻達爾

札以己爲和碩特種國人未附遂推達瓦齊爲汗有小策零之孫

濟噶爾者一作濟爾一作噶爾與達瓦齊爭立各徵兵諸部國中大亂阿睦爾撒

納復爲誘除濟噶爾而還達瓦齊於伊犁寢恃功驕橫襲殺都爾

伯特台吉達什脅降其子納默庫默庫一作納乃遷帳於額爾齊斯河與

其同母兄班珠爾一作巴珠附為和碩特台吉潛謀獨立於是令行三部

侵掠伊犁邊境與達瓦齊相惡達瓦齊三遣兵討之皆不克十九

年達瓦齊使其饒將瑪木特將烏梁海兵八千人自率精騎三萬

同趨額爾濟斯河約東西夾攻阿睦爾撒納知不敵遂與納默庫

班珠爾共率所部東奔收關內附自準部內亂其宰桑薩喇爾一作薩拉

附暨杜爾伯特台吉三車稜等皆先後率眾來降

上諭其眾心離畔預調西北兩路士馬屯邊至阿睦爾撒納三部

來歸將乘時圖大舉雪兩朝夙憤而廷臣懲雍正九年和通泊之

敗多以深入為險惟大學士傅恒主用兵與

上意合阿睦爾撒納之入覲也備言伊犁可取狀

上喜之封為親王既而達瓦齊饒將瑪木特亦脫身來歸準部心

腹爪牙盡為我用遂定議明秋出師直擣伊犁阿睦爾撒納等僉

言不若春時乘其不備一戰擒之並請先遣萬人屯田阿爾泰山



備餉以待大軍

上從之明年春正月丁丑以班第爲定北將軍阿睦爾撒納副之  
額駙科爾沁親王色不騰郡王成袞札布內大臣瑪木特爲參贊  
出北路取道烏里雅蘇台永常爲定西將軍薩賴爾副之郡王班  
珠爾一作薩喇勒  
一作薩喇爾貝勒札拉豐阿一作札  
朗豐阿內大臣鄂容安爲參贊出西路

取道巴里坤兩路軍各二萬五千人馬七萬匹持兩月糧約會師

於博羅塔拉河兩副將軍皆準部渠帥建其舊燾所至各部落望  
風崩角其同族台吉及舊回酋和卓木亦皆來迎降携酮酪獻羊

馬絡繹於道兩軍以五月朔日會博羅塔拉河距伊犁三百餘里

而達瓦齊在伊犁縱酒爲樂比聞大軍掩至倉卒徵兵潛竄特克

斯班第率北路軍由固勒札渡口越推墨爾里克嶺一作特視  
爾里克永常率

西路軍由喀塔克渡口越克特滿嶺一作扣  
們嶺同進兵五月大軍入伊

犁準噶爾屬衆盡降達瓦齊走保格登我師踵至夜遣降夷阿玉

錫等率二十餘騎偵道賚阿玉錫卽乘夜建大軍燾突搗其營大

呼直入賊衆奔散達瓦齊以二千餘人宵遁踰冰嶺南走烏什投

阿齊木伯克霍吉斯一作霍集斯準夷所善也而霍吉斯已陰受將軍檄

卽執之以獻俘至京師

上御午門樓受之論功行賞首獎大學士傅恒贊策功加封一等

公班第封一等誠勇公薩賴爾封一等超勇公阿睦爾撒納晉封

雙親王食雙俸霍吉斯封郡王赦達瓦齊封親王

上欲俟事定後仍四衛拉之舊衆建以分其力而阿睦爾撒納早

蓄異志必欲效綽羅斯渾台吉汗爲四部盟長以專制西域遂隱

以總汗自居擅調兵誅殺擄掠不服賜衣翎頂不用副將軍印自

用渾台吉菊形篆印移檄各部落諱其降自言統領滿漢蒙古兵

陰使哈薩克布魯特流言非阿睦爾撒納總四部邊境不安將軍

參贊密以聞有

詔促阿睦爾撒納至熱河行飲至禮班第趨之行令喀爾喀親王

額林沁多爾濟一作額爾濟沁多爾濟與偕旋奉

密旨乘其未發誅之班第以阿睦爾撒納就道時有哈薩克貢使  
與阿逆偕行恐驚疑生變不敢發阿逆知事洩沿途遷延至烏隆  
古河一作龍骨河距其札布堪河一作札布堪河舊游牧處不遠乃詭言暫歸治裝  
額林沁縱之去乃由額爾齊斯河間道北逸迎其妻子於札布堪  
河時

上已密諭烏里雅蘇台軍營收其眷屬矣阿逆遣黨四出煽亂伊  
犁諸喇嘛宰桑劫掠軍台時大軍已撤僅留兵五百防伊犁班第  
鄂容安俱陷賊中由固勒札赴空格斯轉戰至烏蘭庫圖勒被圍  
死之副將軍薩賴爾亦戰歿西路將軍永常時屯烏魯木齊擁勁  
兵數千附近各台吉宰桑皆來會願聽驅策僉請兼程進勦而永  
常逡巡疑畏反退軍至巴里坤賊勢遂益猖獗

上聞之逮永常治罪以策楞代之額林沁縱阿逆遠逸賜自盡命  
玉保富德達爾黨阿爲參贊兩路討賊達爾黨阿奏言闡拉齊博  
羅布爾噶蘇台一作博羅蘇台兩處山險雪大阿逆既據伊犁必嚴守兩處



以拒大軍擬從珠勒都斯

一作著勒都斯一作俗勒都斯一作朱爾都斯

進兵較為利便廿一年春

正月大兵至特克勒河諜知阿逆僅距一程阿逆詐遣人報台吉

諾爾布擒賊將來獻玉保信之駐軍以待侍衛烏爾登

一作烏勒登

追至

庫隴癸

一作庫隴癸

嶺獲賊黨額林沁亦還阿逆遂遁去二月我兵至伊

犁阿逆已入哈薩克將軍參贊互相咎託言馬力疲竭頓師不進

上以諸臣不足辦賊特命大學士傅恒馳往視師會諸台吉進討

未至復召還五月戊辰朔

上諭褫策楞玉保職以達爾黨阿專任西路哈達哈專任北路命

兆惠自巴里坤赴援達爾黨阿師次雅爾拉左哈薩克汗阿布賚

遣和集博爾根設伏山谷中佯敗誘我我師分部擊敗之斬五百

七十餘級生獲十一人復追至努喇

一作努拉

擒大頭目楚魯克再敗和

集博爾根獲其纛斫三百餘級阿逆易服遁達爾黨阿縱楚魯

克還諭其汗阿布賚縛獻而楚魯克詭辭代為乞命並請寬期達

爾黨阿信之按兵以待阿逆復竄去時哈達哈出北路至嵩哈薩

拉克山

一作薩哈薩拉克

偵哈薩克賊千餘由巴顏山西行擊敗之然不窮追

聽其遠逸準部諸台吉見兩將軍駭懦無能各懷叛志

西師詩注呢瑪哈薩克錫拉特已授職從

征見達爾黨阿為賊所賣笑其無能自哈薩克復生變計

適喀爾喀撒台變起綽羅斯特輝特二部及哈薩

克首先倡亂都統和起率索倫兵五百往勦檄吐魯番伯克莽阿

里克

一作莽鳴里克

及厄魯特兵集闢展而噶爾藏

名臣傳作噶勒雜

哈薩克錫喇

一作布錫拉

魯特台吉呢瑪

一作呢瑪

陰通輝特台吉巴雅爾詭以兵五百會和起見

兵至疑之莽阿里克給告曰我兵也逾時尼瑪等操戈前莽阿里

克自後謀至賊眾蠶集和起手刃數賊中鎗死阿逆聞之自哈薩

克歸會諸賊於博羅塔拉河欲自立為汗準部復大亂達爾黨阿

等皆被逮賊殺策楞玉保於途定邊右副將軍兆惠以千五百兵

駐防伊犁聞變自濟爾噶朗河

一作濟爾哈朗河

轉戰而南

戰於鄂壘戰於庫爾齊戰於達勒奇

殺賊數

千二十二年春正月旋軍烏魯木齊諸賊麇至連晝夜數十戰步

行冰雪泥淖中履襪不完食瘦駝疲馬且將盡戊寅至特納格

一作特納

格爾今之阜康地

兵少結營自固會天大雪霧以風驛傳聲息隔絕不相聞適

侍衛圖倫楚奉

命率巴里坤兵二千由間道來援以三十日至軍圍乃解兆惠既  
得新兵復至穆壘河源往勦巴雅爾諸部並派兵在阿克塔斯烏  
蘭烏蘇搜勦始回巴里坤三月

命定邊左副將軍成袞札布出北路右副將軍兆惠出西路同時

進勦會諸部落自相吞噬

西師特注諸將分南北兩路直指伊犁維時札納噶爾布殺其叔絳羅  
斯汗噶爾藏多爾濟欲并其衆尋又爲台吉達瓦所殺而獻其首軍門

加

以痘疫盛行死亡載道兆惠兵復長驅至賊衆烏合勢不能支五

月乙巳官兵追巴雅爾至塔爾巴哈台山後極險處奇徹布截賊

去路羅卜藏多爾濟等從東攻入奪險五處夜半巴雅爾遁我兵

追之至愛古斯兩路搜尋六月壬戌海蘭察追及之巴雅爾方引

弓海蘭察射中其肘占頗圖射中其頭乃被擒逆酋前後授首

西師  
特注

惟阿逆乘間遁哈薩克六

噶爾藏多爾濟被殺絳羅斯族殄滅無幾輝特巴雅爾亦以叛被誅和碩特汗  
沙克都爾濟心懷搆貳參贊大臣雅爾哈善詞知異謀殲之於巴里坤外

月兆惠等窮追至左哈薩克阿布賚已與阿逆積衅且懼招大兵

乃遣使入貢誓擒阿逆以獻阿逆察有變率親隨八人徒步夜奔



俄羅斯將軍穆檄索之會阿逆患痘死俄人獻其尸時總管端濟  
布搜捕瑪哈沁札哈沁守汛之得木齊哈勒拜與達爾札藏匿烏蘭  
烏蘇山內沙札海地乃率兵渡瑪納斯河掩襲賊於美羅托山賊  
覺而遁追殺百餘人至克伯訥克圖嶺詢知賊黨巴哈曼集等據  
瑪納斯河之小衛和勒晶率兵追入巴哈曼集攜百餘戶越大衛  
和勒晶嶺而逃七月辛卯朔侍衛烏勒登副都統三格等往捕札  
那噶爾布副都統職銜由屯貝勒旺布多爾濟等往捕尼瑪是日  
由屯兵至哈什河獲尼瑪屬人都噶爾札布命爲嚮導次日追至  
哈什河之阿爾察圖山口分兵兩翼擊之賊潰獲尼瑪及其妻子  
其屬下台吉等俱中箭死而札那噶爾布亦於六月中旬就擒壬  
辰參贊大臣明瑞次布昆哈瑪爾問知綽和爾烏喇特等糾合昂  
吉岱踞阿圭雅斯山中伏密林以待因遣兵截去路賊見兵卽逃  
追至葉克特里克嶺賊依山結寨石峯林立冰雪堆積攻之弗克  
因駐兵於明布拉克昂吉岱乘間遁沙喇伯勒九月準部之沙拉

斯嗎唬斯降而復叛由察汗通格山竄海都河阻於水遂自喀喇呼珠至烏蘭和屯會合昂吉諸賊

上諭滿福由阿勒輝進勦以巴里坤辦事大臣阿里袞助之滿福至肯色嶺擊賊敗走有沙喇斯得木齊敦多克哈什哈瑪唬斯得木齊敦多克車凌者僞遣人乞降且言賊酋已就擒請除道迎滿福信之時我兵僅二百七十行次哈喇和落徑險林密下有深溝滿福悟爲賊所紿急麾前隊反賊伏起圍滿福力戰受創墮溝中死明年正月

命兆惠等率兵四千勦厄魯特餘賊時賊衆分四支伺間出沒兆惠由博羅布爾富德由寨里木會師於伊犁賊衆紛紛逃潰匿庫隴癸山兆惠遣將戕其牧羣自率八十騎夜入山口勦之時曉霧彌漫叛黨布圖庫等脫走餘悉就殲富德聞哈薩克錫喇夜逸亦領兵二百越博羅呼濟爾嶺分爲兩隊追及於哈魯勒托羅海獲卓托魯克句得木齊句車隆句而翁罕十四世孫舍稜猶附逆不

降竄匿庫克烏蘇喀喇塔拉境將奔俄羅斯我軍尾及之於布什

古河源射撿其從弟勞章札布含稜詭約降戕副都統唐喀祿馳

踰喀喇瑪嶺後歸額濟納土爾扈特收三十六年與混巴錫同來歸順 詔赦其罪四月叛賊輝齊鄂哲特等就擒兩

將軍遂督兵進勦回部親王策布登布繼之又明年舒赫德阿桂

等繼之於是歷年積賊剿掠台站之瑪哈沁與煽亂助逆之刺麻櫛比擒馘無復子遺準部始平

乃未幾又有南疆回部之亂

回部舊汗者元太祖次子哈薩岱之裔也噶爾丹盛時南疆回部

均歸役屬以昂吉管領各城徵其賦稅並質回酋阿布都實特於

伊犁康熙三十五年噶爾丹敗後阿布都實特來降

聖祖優卹之遣人送歸葉爾羌是為霍集占兄弟之祖至其子瑪

罕木特復為噶爾丹策零襲執幽之伊犁并羈其二子長曰布那

敦一作波羅尼都 一作博羅尼都次曰霍吉占一作霍 集占即大小和卓木也乾隆二十年王師

既畧定伊犁釋大和卓木歸葉爾羌俾統其舊部而留小和卓木

於伊犁阿逆之變小和卓木助逆為亂阿逆亡遁歸南疆時將軍



兆惠遣副都統阿敏道

一作伊敏道  
一作阿敏道

招撫回部大和卓木欲受撫而小

和卓木以助逆自疑阻謂受撫則我兄弟必一人留質京師爲人奴僕不若乘此時圖立國且準部新定反側未安大兵不卽來來則路遠饜艱我守險以拒可不戰以屈也遂自立爲巴圖爾汗傳檄各城愛曼集土馬糗糧以抗大軍回衆數十萬戶皆靡然聽命惟庫車拜城阿克蘇三城阿奇木伯克鄂對等素悉小和卓木殘鷲險忍誓弗從奔伊犁告警兆惠命阿敏道率厄魯特兵二千馳往小和卓木已命阿布都益兵扼守庫車鄂對請待大軍至後進阿敏道不聽率滿兵百人赴庫車歿於陣鄂對還伊犁事聞

上命雅爾哈善爲靖逆將軍二十三年五月雅爾哈善將滿漢兵萬餘率鄂對由哈密趨吐魯番進攻庫車大小和卓木聞之率烏鎗兵萬餘趨阿克蘇戈壁捷徑來援六月領隊大臣愛隆阿等迎擊於托和爾

據武紀作和托爾誤

藍翎侍衛達克他那誘賊至副都統順德訥逆

戰張兩翼礮矢如雨注殺賊二千四百餘人庚午復戰於鄂根河

回語謂之烏恰特河擒斬千餘獲其大燾和卓木兄弟斂餘兵八百退保庫車城

我軍圍之鄂對曰賊必不株守困城勢將遁矣遁有二道一由城

西渡渭干河按渭干河即鄂根河之轉音或作渭計一由北路口越戈壁請設伏兩要隘以待

雅爾哈善不為備二十四日薄暮有索倫兵聞城中駝鳴聲似負

重遠行者以告將軍雅爾哈善仍不為備是夜大小和卓木果以

四百騎潛竄西門出北山口遁西門守者副都統順德訥告將軍

昏夜不宜發兵天曉始遣百人追之不獲而還乃劾順德訥塞責

督將士并力攻城城依山崗以柳條間沙土築之礮擊弗入提督

馬得勝隧道攻城未及城二丈賊覺反塹其外實藁秸焚之我軍

六百人燹焉將軍復劾馬得勝塞責八月守城回目阿布都一作卜阿都

突圍夜遁餘衆開門降事聞

上震怒誅雅爾哈善順德訥馬德勝暨參贊哈甯阿以徇軍書詩注云雅爾哈善等先以

迎勅雷集占殲衆察旗回曾免脫奏報至是沙雅爾城回長阿三和卓木乞降錄其供詞始將雷集占敗入庫車潰圍不得出後乘晝夜遁去諸將並未追擒情節歷叙明故詩云自責不知人遑敢施國憲蓋憾之也時將軍兆

惠奉命來京自請留軍竣西事

上壯之令移師而南大小和卓木自庫車奔阿克蘇伯克閉城弗

納給令赴烏什烏什伯克霍集斯給欵小和卓木圖擒縛以獻小

和卓木覺之奔葉爾羌大和卓木奔喀什噶爾小和卓木聞大軍

將至乃堅壁清野掘塹築臺刈田禾斂牲畜為老師之計十月己

未兆惠軍至葉爾羌陣城東奪其臺賊出精銳數百騎分路來爭

三戰三北遂入城固守不敢出城周十餘里有門十二我軍僅馬

步四千北惠之來以馬步四千人先發留副將軍富德勳阿逆餘黨集大軍繼進兵少不能圍攻乃擇城東隔河水草

深處結營自固所謂黑水營也意嶺北河經喀什城外南河經葉爾羌城外土人呼北河為赤水南河為黑水故曰黑水營兆惠分兵

八百使副都統愛隆阿扼喀什噶爾援路偵知城南英峨奇盤一作英額

齊盤一作英格齊盤山賊牧羣所在謀襲之充軍實丙寅兆惠率千餘騎取道城

東渡黑水甫四百騎橋圯賊以五千騎突出截擊我兵方力戰步

賊繼至騎賊張兩翼圍攻於後隔河之軍既為所截而地復沮洳

不得馳騁且戰且退徒涉歸營陣亡將士百餘傷者數百人兆惠

左右衝突馬中槍再斃再易始得出總兵高天喜戰歿明瑞受傷



賊乘勝踰河來攻相持五晝夜適喀什噶爾賊黨至築長圍困我  
庚午兆惠遣五卒分路赴阿克蘇告急賊決水灌營我軍預掘溝  
以洩之得無害營依林樹槍礮如雨注均遮落於樹我軍反得鉛  
丸萬億還以擊賊會布魯特掠喀什噶爾賊疑布魯特與官軍通  
恐不利大和卓木使人議和兆惠曰不縛獻小和卓木有戰而已  
我軍於圍中掘井得泉掘窖得粟三月不困賊駭為神助我師詩注先是舒德赫得兆惠  
傲取殺兵割云營中有餘糧可支二三月為堅壁計自後回省或用雲梯或用決水皆為我師先覺應  
手破之而營中繕備益嚴故困守雖逾時而人皆有固志至是馳報自將軍下逮介士並整暇如故云

朝廷以兆富兩軍將士勞頓命靖逆將軍納木札爾一作納穆札爾雙義詩注云納木札爾先以都統參

贊北路軍務會擒喀爾喀叛逆荷袞難卜論功加封伯爵參贊三泰聖武記作三格按名臣傳三格係原任副都統廿二年因受布魯特台吉等之欺遠徵兵還革職留營兆惠移師南路時隨將軍効力及黑水被圍與前鋒統  
領鄂實總兵高天喜等同時陣歿並無與納木札爾率師往會兆惠之事聖武記作三格  
誤御製雙義詩序云納木札爾三泰適以奉差而往遇難而殉此雙義詩所由作也

健銳營官兵往會兆惠令副都統愛隆阿速回阿克蘇以俟援軍

雙義詩注將軍兆惠等猝被賊襲時愛隆阿拒河駐後兆惠自圍中遣索倫二人間道傳語大兵未集可速回阿克蘇俟後軍一齊進援納木札爾三泰馳赴黑水過愛

隆阿營使愛隆阿先還雙義詩注云時授納木札爾為靖逆將軍三泰為參贊大臣之信兆惠已知之故亦令暫迴以俟後軍自與三泰奎瑪

岱率騎兵百餘乘夜進遇賊三千奎瑪岱死之納木札爾三泰俱

中創殞於陣富德聞黑水圍急率北路兵千人索倫察哈爾兵二

千冒雪赴援廿四年正月庚寅至呼爾璜一作呼拉瑪遇賊五千騎轉戰

而前行沙磧中五晝夜馬困敝人悉步行齒冰救渴九日渡葉爾

羌河距前軍三百里賊騎充斥不敢進適巴里坤大臣阿里袞奉

命以兵六百解送戰馬二千匹駝千隻愛隆阿赴援之軍千餘皆

夜至我軍得馬士氣復振遙望賊壘火光十餘里合軍往擊橫張

兩翼而進大呼馳薄聲震山谷賊猝不及防昏夜中不辨官兵多

少自相屠殺死者無數餘眾潰遁大和卓木脇中鎗眾昇之入城

我師詩注云富德報至稱本年正月初六日統兵行至呼爾滿遇賊騎五千眾夾擊轉戰五日四夜會參贊阿里袞營解馬匹亦至分翼所陣衆剽潰數騎千有餘人餘悉負傷敗竄而遁會大和卓木脇中鎗傷賊衆昇之入城且潛回喀什噶爾矣我

師長趨而進兆惠見圍賊日少知援軍至備內應忽聞槍礮聲隆

然遙覘東方煙塵大起卽勒兵潰圍出與富德軍合力夾擊殺賊

千餘盡破賊壘兩軍遂還阿克蘇初小和卓木乘黑水之圍遣其

黨圍取和闐六城已失其三至是兆惠檄副都統瑚爾起及巴圖

濟爾哈爾率偏師馳救至伊里奇賊望風遁馳抵哈拉哈什乘天

大霧直搗賊營遂復其城

御製詩所謂博羅齊行者也

和闐賊遁詩序和闐為回部扼要重地所屬六城曰伊里齊哈拉哈什玉爾哈什三城百計抵禦以待援師其餘三城力不能支復叛降賊兆惠等解圍後即遣副都統巴圖齊爾哈爾瑚爾起等分兵馳

札布噶布舒及回長鄂對伯克等往招歸順職大軍被圍小和卓木遣賊黨往攻和闐齊凌札布噶布舒等分守伊里齊哈拉哈什  
救望見賊於時值大霧彌漫我師乘勢奮勇直前衝擊賊軍渠魁阿布都海里  
克及和集雅斯二人鄂斯滿被創竄去餘賊悉遁和闐解圍其三城仍即撫定明年六月兆惠由烏什取

喀什噶爾富德由和闐取葉爾羌各率兵萬五千人明瑞率前鋒

千餘騎先進兩和卓木懲葉爾羌之敗震讐天威聞王師分路進

攻遂棄城驅人畜逾葱嶺西遁

御製詩論道會兩和卓木出我軍威於大兵未至葉爾羌喀什噶爾二十日之前已離巢遠竄

初兩和

卓木之南歸也舊部數十萬戶念其先世推誠愛戴而小和卓木

虐用其民厚斂淫刑衆心解體故其出亡也舊部罕從之者二酋

欲赴巴達克山

一作拔達克達

一作博達克山其黨欲投霍罕

一作浩罕

各遣使往而霍罕不

報乃赴巴達克山閏六月辛丑明瑞率前鋒千餘騎追至戰於和

什庫珠克嶺

一作霍斯庫魯克

其地即葱嶺之巔有黑龍池周數百里回

語謂哈喇淖爾即釋典所謂阿耨達池也

一作阿賴揚芳

賊匿其輜重婦

女以精銳六千伏谷口而羸師誘我我軍僅九百騎奮勇仰攻轉



戰三時斬馘五百賊逃至阿爾楚爾兩山峯頂以待我師富德與  
霍集斯等統中軍參贊明瑞阿桂為左翼參贊阿里袞巴祿為右  
翼又益以奇兵援兵隊各為二別遣侍衛額爾登額等分率巴圖  
魯兵二隊備四路應援而領隊齊凌札布殿後奇兵先奪其左右  
兩山俯瞰下薄賊陣稍動我軍三面乘之追攻廿餘里斬其驍將  
阿布都克勒木等奪獲器械無算我兵傷者纔一卒耳

御製詩注茲役也我兵馬步統計不

過三千人勦逆回四千餘衆擒斬者已過其四之一而助逆渠魁數十人并臨陣殲之逆會黨悉殲盡

是為阿爾楚爾山之捷七月己未至伊

西洱庫爾河乃巴達克山界也兩涯皆山大和卓木以家屬保河  
西嶺為走計小和卓木以萬衆據北山決死戰富德令阿里袞等  
由南岸趨西嶺自率兵攻東峯賊踞高臨下我軍仰攻不得利乃  
選銃手數十人緣山北巔俯擊之阿里袞陣山上以火器遙擊賊  
據北山麓狹而逼水輜重徒屬相擁塞我兩軍又分扼其走路賊  
無所遁乃令鄂對等樹回纛大呼招降降者蔽山而下聲如雷動  
小和卓木手刃數人卒不能止降者萬有二千兩和卓木挈其妻

孛僕從數百人走巴達克山小和卓木之擁衆而西也怒巴達克山酋素爾坦沙不親迓斬其使素爾坦沙忿而興兵拒戰於阿爾渾楚嶺一作阿爾渾楚哈嶺縛布那敦而以兵圍霍集占賊退保齊那爾河素爾坦沙以其屬進戰賊不能支傷背及膀擒之囚於柴札布柴扎布者巴達克山繫囚處也富德遣使者往諭令獻俘進軍瓦汗以待之素爾坦沙乃殺霍集占函首以獻並以全部納款稱臣

上御午門受俘馘凱旋將士行抱膝跪見禮兆惠富德進爵酬庸命爲御前侍衛大臣諸將士獎叙各有差其勲績尤著者圖形紫光閣死事諸臣均予旌卹並立石勒銘於伊西洱庫爾淖爾以昭武功今其碑僅存斷趺和什庫珠克以西之地亦歸俄屬非復昔日力征經營之舊矣先是自庚辰戡定西疆之後伊犁築城堡墾田疇回部則減賦薄征視地大小險夷各駐以大臣戍之防卒以烏什介於阿克蘇喀什噶爾之間爲回部適中地慮阿奇木伯克霍吉斯反復不易制

新編國志  
詔召入京師以阿布都拉代之阿布都拉者哈密回部貝子玉素  
富之弟也

朝廷以其久內附故授是職俾監其衆阿布都拉故暴戾無親其

屬役多哈密回民相助爲魚肉勒買布糧馬牛攘其壯者而以倍

值售其羸者辦事大臣素誠一作蘇成酗酒宣淫時留諸伯克妻於署使

兵役艱逐爲樂衆心憤懣無所訴會征運沙棗苛役回民因相聚

謀亂有奔告阿布都拉者阿布都拉叱逐之回民避亂者相率走

辦事大臣署素誠復拒之不納烏什小伯克賴里木圖拉一作阿聚

衆五百餘夜縱火焚掠殺阿布都拉素誠自戕時乾隆二十九年

二月也阿克蘇副都統下塔海一作弁塔海聞變入告烏什戰阿補詠注烏什卡倫

蘇報知下塔海即據以入告時方自杭州卽率兵赴援烏什回衆爭開城迎下塔海揮

銃擊之城復閉時城中爲變者僅數百人若布以誠心解散脅從

必有縛渠魁以獻者而下塔海庸懦無謀竟以礮攻城迫衆從逆

賴里木圖拉揀馬步二千拒戰下塔海敗走連敗庫車大臣鄂寶



之兵喀什噶爾參贊大臣納世通率兵至惶遽無措賊益張伊犁

將軍明瑞兼程赴援申明軍律賊始懼死守不敢復出烏什戰聞補詠授師詩序云阿克蘇喀什

噶爾與烏什相倚角應設最近而下塔海與駐喀什噶爾之都統納世通雖亦領兵往救但二人素未經戰陣無益於事時明瑞聞而統兵赴援兼程進至則申明軍律并方攻城賊始困窘因疏劾下塔海

納世通庸妄乖謬諸罪狀皆伏誅悉故詩序納世通下塔海平時安自魯大凌廣諸回素為衆怨所集且下塔海初至烏什城下不事詰罰輒施鎗礮以攻及賊

出拒復怯而敗走納世通繼至亦茫然不知所措賊益逞其負隅之勢明瑞詢察得實膽章入告與柏琨所奏悉合因各按其罪重懲之賊潛遺其黨巴布敦巴敦武紀作巴敦布誤求援

於霍罕之厄爾德尼伯克並以詭語煽亂所過諸城遠近洶沸回

衆多乘機謀為亂庫車伯克阿那雅爾置酒饗衆以利害大義相

責陰遣人縱馬收軍械人心稍定喀什噶爾阿奇木伯克噶代默

特傳語布魯特諸部謂叛逆者祇烏什一城布魯齊里克齊遂誘

執巴布敦以獻布魯特稱其會謂之比如回部伯克之類賊外援既絕我軍復斷其樵牧賊勢益

孤烏什城南倚山面河森林叢翳如列屏隔河礮不能及自五月

至七月屢攻未下賊糧絕馬饑折屋而爨撤茅而飼俘仆枕途巷

賊計窮夜出拚死襲我營賴里木圖拉中箭死賊舉其父厄塞木

圖拉為阿奇木悉衆死守會一夕賊盡伐城外樹雉牆豁露明瑞

擒驍銳六百夜薄其城登陴毀堞奪擊獲大勝

攻堅特注烏什初變明瑞赴援復令尙書阿桂馳驅往會之彼時以烏什

藩爾孤城又無外援易於收復毋庸悉銳進攻極難致多傷我士卒因險合嚴急攻圍待其勢窮力蹙乘機取之賊既窮蹙乃益固守不敢出明瑞等以時屆秋令師旅不宜久縻乃簡巴圖魯六百餘中夜攜雲梯分道潛往薄城兩隅東北隅先登賊未覺挺刃交下賊狼狽即舉火招繼進者又循牆自北而東南悉墜有賊衆憂悸有沙布爾者烏什之

舊商伯克謀縛厄塞木圖拉詣軍門納款獻城賊遂內潰八月甲

午明瑞入城盡戮其黨亂始平於是奪其城堡悉歸諸官厚駐重

兵立爲都會自是南北兩疆放牛歸馬無復西顧之憂矣乃越五

十餘年而南疆復有張格爾之變

張格爾者大和卓木布那敦之孫也大和卓木死其子薩木克自

巴克達山逃匿浩罕生三子張格爾其次也以誦經祈福傳食各

部落奸回假餽和卓之名歛財煽衆譎言蠶起時承平日久諸回

城辦事領隊大臣寢肆腴削而阿奇木伯克以供給爲名苛征浮

歛喀什噶爾歲歛赤銅錢八九千緡所用赤銅普爾錢一當內地之五葉爾羌萬餘緡和

圓四五千緡土產氈裘金玉緞布索需尤鉅章京伯克皆飽私橐

而以十之二奉辦事大臣各城大臣不相統屬又距伊犁將軍遠

威福自出甚或廣搜回女更番入值奴使獸畜回民眈眈仇視積  
怨入骨髓嘉慶十九年孜牙敦之案枉誅圖爾第邁莫特其子阿  
仔霍奔塞外憤煽其種人圖報復嘉慶二十五年八月張格爾糾  
布魯特數百人寇邊右頭目蘇蘭奇者入報章京綏善叱其妄逐  
之蘇蘭奇憤而從賊張格爾糾阿仔霍集衆三百餘入塞燒毀圖  
舒克塔什卡倫戕副護軍參領音德布陣亡滿兵十餘人領隊大  
臣色普徵額率兵敗之次日官軍尾及塞外遺炊尙然賊兵不過  
二十騎使兼程追之賊成擒矣乃竟回軍喀城與參贊大臣斌靜  
宴中秋節斌靜誅俘賊百餘人滅口而已

上命伊犁將軍慶祥往勘盡得斌靜貪婪淫虐狀奏聞褫職以永  
芹代之道光四年秋張逆自阿賴糾衆二百焚烏魯克卡倫官兵  
傷亡三十餘人遊擊劉發恒擊敗之賊竄卡外五年夏張格爾屢  
糾布魯特掠近邊遣人詐降勾結四百餘人爲亂奈曼

一作納木干在喀什  
噶爾西七百餘里

部落不從七月竄雅薩克糾汰劣克等謀犯喀什噶爾

或言張格爾窮  
蹙僅存十餘人



芹檄領隊巴彥巴圖率兵二百往捕踵至塞外都爾伯津不見賊  
乃縱殺汰劣克

一作汰  
列克

妻子及其游牧百餘人而還汰劣克忿甚率

所部二千追圍山谷中力戰一晝夜官軍半死傷巴彥巴圖歿於  
陣賊遂猖獗十月永芹病故以慶祥代之大學士長齡爲伊犁將  
軍六年夏五月張格爾遣頭目赫爾巴什糾合綽羅薩雅克愛曼  
諸族爲我軍所獲其耕種雅爾者設伏殲之六月張格爾率安集  
延布魯特五百餘人出開齊山突至阿爾圖什拜其先和卓木之  
墓回人所謂瑪雜也距喀什噶爾城八十餘里慶祥檄協辦大臣  
舒爾哈善等率兵往勦殺賊四百餘人賊退入大瑪雜官兵圍攻  
之適夜雨昏黑賊突圍走各城回衆響應旬日萬計慶祥盡調各  
營卡兵還守哈城烏凌阿穆克登布禦賊於渾河先後戰歿賊進  
圍喀城七月

詔授伊犁將軍長齡爲揚威將軍節制諸軍烏魯木齊提督達凌  
阿伊犁領隊祥雲保分統滿漢官兵前往會勦楊遇春以欽差大

臣統陝甘兵五千人山東巡撫武隆阿統吉林黑龍江馬隊三千  
人均出關參贊軍務賊圍攻喀城慶祥嬰陣固守先後斃賊萬餘  
而彼衆我寡援兵不卽至八月己巳賊潛掘地道陷城慶祥率兵  
民巷戰力竭自縊以殉諸城多從逆英吉沙爾葉爾羌和闐相繼  
失陷賊分兵東犯庫車烏什均戒嚴賊出伊勒都東距阿克蘇八  
十里參贊大臣長清飭參將王鴻儀率兵六百人戰於都齊特斃  
賊多名賊麇集陷圍中彈藥盡王鴻儀及千總岳振太均戰死賊  
逼渾巴什河一作渾八升河而陣距城四十里長清遣額爾古倫擊敗之會伊犁烏  
魯木齊援兵至兵威稍震賊糾喀什噶爾和闐回衆六千屯聚渾  
巴什河南岸長清命參將存柱王登科分兩路進達凌阿巴哈布  
亦督兵會勦斃賊無算賊突以偏師渡托什罕一作塔什干一作達失于又一作塔里干河猛撲  
協領都倫布營以伏兵絕我軍援路副將郭繼昌破擊之時額爾  
古倫統錫伯兵防河與郭繼昌同赴援奮前搏賊都倫布見之內  
外夾擊賊衆大潰死傷及生擒者千數百人陣斬賊首庫爾班素

皮賊自是不敢窺河北東四城始獲安十月張逆遣賊目扼守柯爾坪糾南北兩莊賊三千人協力以抗官軍柯爾坪距阿克蘇三百里山路崎嶇中隔戈壁提督楊芳分兵兩路抄賊後副將胡超由中路進搗身先士卒徒步直前搏鬪我兵呼噪乘之賊衆披靡追殺十餘里至大舍子卡倫外盡殲焉張逆既據西四城乃以賊目約霍普爲僞和闐王長齡檄阿克蘇伯克阿奇木日伊薩克偵和闐賊勢離間黑回各伯克獻城反正和闐伯克伊敏故黑帽回也張逆以黑回非霍集占族虐待之黑回切齒伊敏乘間聚回民二千殺百餘賊擒約霍普以獻會大雪封山官軍未卽至城復陷上命長齡兵分奇正兩路進長齡疏言正兵由臺站奇兵由烏什草地繞出喀城惟烏什卡倫外抵巴爾昌山溝險狹戈壁數百里經布魯特部落半爲賊煽孤軍深入兵分力單相去二十餘站聲息不得通達非計之得也且喀城賊衆數十萬非大兵并力中路

不可



詔從之七年二月壬子長齡整軍西發持十日糧庚申次巴爾楚軍臺喀葉分道處也留兵三千以防南路繞襲之賊戊辰次大河拐未見賊糧罄將士請速戰時賊衆五萬聚洋阿爾巴特是夜以三千人潛襲營擊敗之賊沿途掘溝坎決河灌道師行戈壁中反得水濟士馬次日抵洋阿爾巴特賊衆二萬陣沙岡上互五六里我軍分三路長齡楊遇春將中軍武隆阿居左楊芳居右同時進撲賊據岡下壓者再大軍爭奪岡而上賊衆披靡擒斬逾半盡得其軍器牲畜糗糧濟師辛未至沙布都爾莊葦湖沮洳樹林環繞賊衆數萬憑長渠自固渠外暗掘坎陷橫阻騎兵我軍以槍礮連環迭進賊亦以槍礮拒之不少動長齡揮步卒躍渠猛撲接以短兵馬隊由左右淺渠渡橫截入陣賊營火藥轟我軍乘之槍矢雨集安集延大頭目色提巴爾第桴鼓促戰馬甲貝洪阿抽矢注射應弦而踣賊衆始潰追逾渾水河三十餘里擒斬萬計賊騎數千突出西北林中楊遇春擊敗之復以礮擊潰河西馬步二千援賊

是役也陣斬回逆大頭目素不卡克安集延大頭目占巴克色提

巴爾第三人後二日賊數萬據阿克瓦巴特依岡背河癸酉我軍

列陣而往距城五十五里見牛羊蔽野賊騎數百皆反走知爲誘

兵嚴戒勿掠勿追距賊十餘里止營乃夜遣哈浪阿一作哈明阿阿勒罕

保率吉林勁騎千人分探左右間道出賊後次日壓賊壘而軍騎

兵張左右翼川陝步兵居中賊踞岡上排雁翼陣以待我軍買勇

施槍礮賊佯敗誘我我軍連環進擊乘風放噴筒賊馬隊冒火突

煙乘勢下撲長齡令籐牌兵衣虎文衣躍陣而前馬駭狂奔岡後

有紅衣賊目麾伏兵起而吉林勁騎已繞出回城後拊賊之背矣

賊前後受敵勢不支分投狂竄我兵越沙岡分途追殺斃賊三萬

餘生擒數千斬安集延二酋阿瓦子邁瑪提及阿渾那爾巴特追

至洋達瑪河距喀城八十里搜勦沿河回莊餘賊殆盡乙亥進兵

渾河北岸賊悉衆阻河而陣互廿里築橫壘蔽之穴壘列銃鼓角

聲震天地勢張甚長齡遣死士數百夜擾其營謹囂達旦次夜三

鼓時西南風起折木揚沙天雲晦長齡以賊據形勢衆寡不敵恐  
昏晦中爲所乘欲退屯十餘里須臾而進楊遇春不可曰此天贊  
我也昏暈中賊不辨我兵多少且客兵利速戰難持久乃遣索倫  
兵千騎繞趨下游牽賊勢而自率親兵從上游驟渡據上風以扛  
礮轟賊礮聲與風沙聲相搏若百十萬兵壓至乘勢衝入賊壘賊  
衆崩解三月丙子我軍乘勝復喀城時賊衆運喀城大礮未至又無調度不知將角變  
伏之術惟厚集兵力於一隅故一敗則全軍皆覆張  
逆已先遁僅獲其甥姪及安集延僞帥推立汗薩木汗並從逆之  
伯克數人而已報入

上嘉其克復功嚴飭追捕張格爾毋任遠颺庚辰楊遇春復英吉  
沙爾辛卯日進兵葉爾羌次倭巴侍衛阿布都爾滿說其城阿渾  
伯克迎降縛獻賊曰烏舒爾巴凱等十一人別遣楊芳勦和闐和  
闐回衆縛獻賊首約霍普投誠而張逆復遣賊曰噶爾勒玉努斯  
率安集延兵暨朶蘭一作格爾回千餘攻陷之戕殺迎降之阿渾穆圖巴  
拉父子糾衆數千以拒官軍楊芳至毗拉滿賊列陣以拒楊芳督



馬步進擊潛以精騎繞北沙山抄賊後賊軍有花衣賊目者執紅旗揮衆死力抵戰我軍前後合擊賊漸不支突賊騎五六百出東南沙山後刀矛交加勢甚厲吉林佐領富爾松阿怒馬陷陣攫花衣賊目噶爾勒賊失其渠陣大亂官軍四面乘之殺二千餘人擒斬逆酋玉努斯乘勝抵城下舊時伯克皆開城降西四城定奏入上以張逆脫逃棄前功留後患奪長齡紫韁楊遇春武隆阿太子太保少保銜張逆之出竄也欲投浩罕浩罕不受竄赴木吉六月楊遇春楊芳屯兵八千人出卡追捕諭各部落擒獻者賞爵郡王金十萬兩楊芳屯兵阿賴楊遇春屯兵色勒庫爾阿賴者葱嶺之脊脊以西水皆西流喀城赴浩罕道也時張逆由木吉奔拉克沙又奔達爾瓦斯之藏堪七月楊芳追勦至塔里克達坂遇賊匪二千人伏兵山上彈丸紛注協領都凌阿參領郭全軍中鎗陣亡協領壽昌奮力仰攻副將郭繼昌督軍直上擊斃紅衣賊目三人賊始敗退分路兜抄斬獲千人

上以殘匪損我兵甚衆而久未得張逆蹤跡所在老師糜餉甚非所宜命暫留兵八千擒拏張逆餘俱凱旋長齡奏言回民素崇和卓張逆卽擒其兄弟之子尙在浩罕終爲後患我今僅以八千留防塞外兵勢太孤不若赦回曾布那敦子阿布都里使總轄西四城庶維人心省兵力亦安邊之一策也武隆阿亦以爲言

上怒褫長齡武隆阿之職均留任九月命直隸總督那彥成授欽差大臣代長齡籌備西事時張逆由藏堪竄庫蘇傳食諸部落十月二月聞大兵撤防謀乘間搶踞喀城長齡密遣黑回出卡縱反間言喀城空虛回衆均翹首以望和卓張逆遂糾布魯特步騎五百餘人乘除歲潛襲喀城長齡楊芳嚴兵六千以待甲戌張逆由開齊山舊路潛入阿木古回城黑回四百餘持械要拒賊知有變反竄出卡楊芳分兵三路追及喀爾鐵蓋一作坎爾山殲賊二百賊率死黨三百餘騎舍命衝突楊芳遣馬隊潛抄賊後領隊阿勒罕保由兩路蹙之賊竄山溝我軍圍勦擊斬殆盡馬賊三十騎擁張逆越

山迷路滑境仄乃棄馬攀登總兵胡超都司段永福等徒跣追及山巔生擒之八年正月庚戌捷聞

詔封長齡二等威勇公楊芳三等果勇侯均世襲罔替並賞戴雙眼花翎解賜

御用珍物胡超加提督銜賞騎都尉世職並賜翎管撥指荷包其餘將士賞賚有加五月檻送張格爾至京郊勞受俘

內地勦賊不獻俘僅外夷獻俘舉行是典勒

碑太學及喀爾鐵蓋山是役也用兵三萬六千有奇用帑銀千餘萬兩張逆既伏誅那彥成檄諭浩罕縛獻逆裔家屬浩罕不從

上以逆孥不足為邊患

敕那彥成嚴守卡倫絕其貿易計窮財困當自獻仇以求市也那彥成盡逐夷商出卡沒其貲產諸夷憤怨奉張格爾兄玉素普為和卓糾結布魯特安集延數千人入寇參贊大臣札隆阿不為備十年八月甲午聞警始令幫辦大臣塔新哈赴喀浪圭

一作哈

副將

賴永貴以兵千六百赴明約洛

一作明

禦之賊以輕兵誘我入險伏



兵起截其後全軍覆沒賊勢遂猖分擾喀什葉爾羌各城札隆阿奏聞

詔伊犁將軍玉麟參贊容安迅調兵馳赴援固原提督楊芳甘肅提督胡超同兵出關勦賊

命大學士威勇公長齡為欽差大臣督辦軍務旋復授為揚威將

軍哈朗阿楊芳參贊軍務時壁昌為葉爾羌辦事大臣僅有兵六

百聞警徙商民城內傳集諸伯克諭以禍福協力守城選派回兵

分防科熱巴特西通噶英二城亮噶爾一作亮格爾西通色呼庫勒巴爾楚克東通樹窩子諸要隘兵各

二百益回兵三千人部署甫定賊來犯壁昌檄回兵千餘屯回漢

二城之間官兵四百陣東門外翌日賊驅馬步萬餘來撲我兵併

力擊之槍礮齊施斃賊數百擒入回城之賊三百餘賊衆潰走我

兵陣亡一人回民五人是役也回漢一心以少破衆而阿奇木伯

克阿布都爾滿之力為多奏入

詔賞壁昌副都統銜將士分別獎勵賊竄舒克舒回莊官軍追至

科依克察爾鎗斃布魯特十餘人奪還所掠人畜賊衆遂奔而賊之攻喀什噶爾者札隆阿督隊出城三戰皆捷毀其礮臺時英喀二城雖被圍困而諸回伯克皆厭亂故與官軍協守無貳志從逆者惟霍集占家奴朶蘭回戶而已然朝脅暮散截路奪掠而已時援兵不卽至伊犁參贊大臣容安領步兵四千五百餘抵阿克蘇觀望延宕致喀什噶爾城圍久不解各回城子女玉帛搜括殆盡

上震怒褫容安職逮問以哈豐阿代領其衆十月賊以馬步千人聚葉城東北亮噶爾其壁昌使阿奇木伯克阿布都爾滿決大河渠上游斷賊路辛卯副將任貴邦守備黃泰把總羅延分隊迎勦阿布都爾滿率回兵助戰賊騎涉水將抵南岸任貴邦礮擊卻之卽率兵渡北岸賊首先遁官兵追殺四十餘里斃賊三百人奪獲鍋仗旗械甲辰西路賊千餘騎自英吉沙爾犯葉城十一月乙卯環城而陣相持五日哈豐阿率援兵三千五百至直薄賊營壁昌揮兵接戰大敗之賊衆西遁庚申日追敗於喀拉布札什擒斬數

百焚回莊匿賊五百沿途追殺十二月抵英吉沙爾賊聞風西竄  
我兵踵至喀什噶爾札隆阿胡超哈朗阿楊芳相繼至賊鼠竄出  
卡外立解英喀兩城之圍奏入

賞哈豐阿雲騎尉世職進勇巴圖魯名號將士以次獎叙有差浩  
罕聞大兵將三路進討乞援俄羅斯俄人不納乃遣三頭目求市  
長齡奏言安邊之策振威爲上羈縻次之浩罕八城諸夷善騎馬  
專恃劫掠布魯特哈薩克諸族受其欺虐爭求內徙果欲聲罪致  
討簡精銳三四萬人傾巢掃穴可立待也惟自喀浪圭至浩罕千  
六百里中隔鐵列克嶺爲浩罕布魯特交界兩山夾河僅容單騎  
路險師勞不若寄信開導爲相機羈縻之計

詔從之浩罕喜過望遣使來抱經請盟通商納貢有喀城叛弁譚  
祿者先叛降張格爾繼降浩罕至是同使來磔死壁昌曰回疆之  
吏職稱司牧回羊也罕浩狼也魯布特守我藩籬譬則犬也六年  
十年浩罕再犯塞犬亦隨狼食羊故其吠聲亦不足信而欲以夷





新疆圖志卷一百十六

兵事二

咸豐以來中原多故陝甘回匪相繼爲亂惡氛狂焰煽及西土冲  
筠之黨梟結之徒聞聲響應翫禍弄兵於是天山南北烽火互二  
萬餘里所在糜沸賊如蝟毛而起矣初同治初元伊犁三道河回  
匪楊三惺馬二聚黨謀亂事洩捕首從二十餘人署巴彥岱領隊  
阿克達春印房章京額騰額均以回民爲肘腋患請剿捕勿貽後  
患將軍常清曰伊犁九城皆回民也不分良莠而盡誅之是召亂  
也遂置楊三惺馬二於法餘俱勿問三年夏四月庫車土回馬澂  
謀爲亂玉門楊春回逆黨也潛至庫車結回目黃和卓及田滿拉  
蘇滿拉同時反己亥焚庫城五月壬寅城陷辦事大臣薩凌阿英  
吉沙爾領隊大臣文藝葉爾羌幫辦大臣武仁布死之札薩克郡  
王愛瑪特被脅不屈遇害賊犯喀喇沙爾辦事大臣依奇哩拒諸  
開都河飛檄徵烏魯木齊兵未至城陷依奇哩檄家自焚東四城

相繼失守烏魯木齊都統平瑞聞變舉提督業布冲額往援時楊

春潛至烏垣主參將索煥章家煥章故回種與春合謀阻業布冲

額發兵平瑞改檄協領穆克德肯率滿兵赴援都司張維昶率汎

兵百人先發庫爾喀喇烏蘇領隊文永率綠旗兵千人繼之煥章

遣其黨馬如智伏而要諸隘癸未官軍發回衆集南關禮拜寺列

炬橫戈議事遣犯朱小貴奔告業布冲額煥章曰妄耳誣而殺之

援軍至喀喇沙爾之新井子歿於伏

賊定新疆記作兵至蘇巴什斃於賊西陲戰略作烏什遠拉遠過伏斃今據巴里坤檣冊

死之烏魯木齊滿漢二城戒嚴初常清聞庫車之亂飭領隊布和

德協領三音布馳往援抵冰嶺聞東四城已陷賊分兵據冰達坂

不能前而庫爾喀喇烏蘇相繼變遂援烏蘇六月己卯楊春糾南

山東西溝回衆二千餘人攻陷達坂城辛巳索逆喉迪化南關回

衆入城焚掠使其黨馬順開門納之業布冲額聞變匿索逆宅八

日仰藥死

湘軍記作索逆手刃業布冲額其全家西陲戰略作提督閩署自焚業布冲額自派長將軍烏垣城守記則謂提督出救火署被焚蓋署焚而提督死於索宅也

平瑞率衆登  
陣夜二鼓見漢城火光起殺聲震天把總金章奔至滿城縋以登



曰漢城陷矣章與游擊張維峻巷戰維峻死矣平瑞飛章入奏並檄伊犁請援是日昌吉變起知縣恩錦遁典史秦某罵賊死闔門殉難南路回逆竄擾吐魯番領隊大臣榮慶守禦十餘日會纏回變城遂陷庚午賊犯鞏甯東關協領隆慶出擊賊遇伏佐領裴德布死於陣辛未賊南攻門礮擊却之賊更番攻城負梯戴釜冒矢石以進成員張長慶民壯程世春率兵民竭力抵拒賊不得逞決黃渠灌城平瑞募死士洩之署迪化縣孔昭恒把總金章率兵民屢出擊賊程世春尤勇健敢戰單騎陷陣身受數十創力戰死滿城自被圍無日不出戰而士卒常苦饑逆黨馬如智引吐魯番纏頭依薩和卓札依提五六千人與索逆合賊勢大張時楊春爲回目撒拉阿渾所殺索逆懼推河回安明即妥得達爲首安明者關內逸回索逆所師事者也丙寅昌吉縣恩錦都司馮吉或作濟率民勇四千餘敗賊於滿城西賣糧入城人心少定鎮迪道伊常阿以書招索逆不聽恩錦請乘勝出擊平瑞曰君一城保障也宜堅守以待援

兵而伊犁援軍領隊圖恰布畏賊不敢進賊伏兵首蓆溝斷城中  
糧路遂大困八月辛巳賊萃攻城東南隅據廢垣列礮以擊潛穿  
隧道轟城辛卯地雷發城圯數丈賊爭進張長慶率民勇死力抵  
禦平瑞守南城樓以神威大礮橫擊之賊死無算時城中糧絕將  
士饑罷呼圖壁士民餽糧二百餘乘平瑞檄馮吉鰲迎於途賊復  
劫之吉鰲陣亡自是守城者爭縋城出求食無戰志矣九月辛丑  
北城火起見首白抹額者出帳下平瑞知有變忽報賊掘東門入

矣平瑞招滿營健兒二十餘人東趨迎擊至鼓樓平瑞自戕載定新編  
記作平瑞

自焚應以烏垣城守記為據蓋長庚身在圍中  
親見之也湘軍記作平瑞盛服往詣和死亂兵伊常阿恩錦榮慶皆死之文武官弁殉難

者百餘人兵民逾萬知州孔昭恒詭辭以遁時哈密回為變據鹽

池奇台阜康昌吉皆陷載定新編記云奇台縣知縣恒願豫豫其糧垣規與大隗恒願以民變上民遂開堂  
縣衙數百人皆土回以彈壓為名與民戰恒願反冀土回土回勢益橫遂焚掠奇台

居古城寶阜康八月癸未阜康  
陷知縣裕厚逃居民誰殺屠瑪納斯亦叛綏來縣知縣段桂齡死之布和德之

援烏蘇也於是月抵烏蘇城賊據守城外禮拜寺屢攻不下適安

集海回匪來援又有傳伊犁回匪變者兵皆懷退志不戰而潰布

和德死之妥逆既據有烏垣益自尊大署其黨馬陞馬秦等十餘人爲僞元帥降索逆爲散目置之吐魯番索逆故提督索文子其母屢誠之反正不聽以失勢憤鬱死西路自鞏寧失守上游已無完善之區而南疆賊勢尤盛喀什噶爾回目金相印結布魯特叛回思的克連陷和闐各城葉爾羌參贊覺羅奎棟和闐領隊慶英等五十員同時殉難番戍弁兵更無噍類矣東路哈密爲新疆南北門戶而巴里坤則北路咽喉也至是作亂焚廂關戕把總高萬清丁巳游擊何瑄署領隊色普詩新分兵勦捕獲逆首馬天保暨哈密竄匪楊生財七人誅之瑄乃繕城蒐兵民有固志十月丁酉馬陞率羣賊東下十一月科布多蒙古援兵遇賊而奔賊陷濟木薩縣丞陶珙棄城遁丙辰陷古城漢城城定新疆肥古城漢城之陷在癸丑日木壘河鄉約萬忠恩等結民團自衛惠寧惠遠纏回相繼爲亂旂丁根老八無賴也糾痞黨千餘與之合所在剽掠常清屢出兵皆失利甲子明緒代常清爲將軍賊據巴彥岱城協領穆克德援之戰黃渠中伏死



其子松齡  
同時殉難

賊攻古城滿城領隊保恒病篤惠慶代領其軍力籌守禦十

二月己丑色普詩新代理烏魯木齊提督

新編烏魯木齊提督文  
祺行至巴里坤病歿

率滿漢兵

並招集奇台戶勇馳援古城四年春正月丁酉朔塔爾巴哈台回

匪二百餘猝入城參贊錫霖拒以兵有為匪黨求撫者庚子錫霖

率從官及副將米興

鐵定新編  
配作米興

議於城外禮拜寺米興者回種也與阿

渾伊瑪木謀倡亂錫霖甫入坐突一矛從窗隙刺入領隊博爾果

蘇知為興謀急起手格之矛折轉持其鋒刺興洞胷死回衆怒錫

霖博爾果蘇暨通判音登額主事富勒斐圖等俱鬪死寺中新簡

參贊武隆額登城拒守賊四出殺掠鑛首劉光和聞警集鑛夫數

百人來援賊設伏要擊之潰死大半庚戌伊犁賊陷惠寧領隊穆

克登額率官兵巷戰三晝夜闔城死者二萬人穆克登額自焚死

辛酉色普詩新敗賊於富家垵把總高吉官策賊衆在後遲且至

謂我軍宜乘勝至城下出賊不意圍可解也止此必為賊乘不聽

壬戌天方曙賊果大至督兵力戰彈藥且盡賊詐呼乞降怠我軍

高吉官叱不顧而滿兵爲所誘陣遂亂色普詩新惠斌功訥布高  
吉官皆戰死是役也文麟統練軍千五百人坐視不救故官兵盡  
覆賊死者亦千餘人二月乙亥古城滿城陷領隊惠慶以下死者  
七千人是日迪化勇目徐學功率團勇攻烏垣賊卽日回救學攻  
迪化人本將家子世田南山賊困鞏甯時學功率弟七人屢突圍  
送糧學明學忠學孝皆歿於賊學功據南山結礮寨集精壯拒賊  
漢民往依者日衆學功年少而勇屢挫賊鋒賊畏憚之時趙興體  
起綏來孔才起濟木薩鄧生玉張和張興起奇台各團練數百人  
日與賊戰漢民之不盡亡於賊者皆數人力也馬陞馬忠諸逆黨  
建立王府於迪化城外尊妥逆爲清真王專制西安路金相印勾  
結安集延曾帕夏擾西四城安集延者敖罕八城之一與喀什噶  
爾鄰俄滅敖罕踞塔什干都城安集延獨免其曾阿古柏收諸部  
餘燼自稱和碩伯克吐魯番闢展以西土回皆應之號爲帕夏帕  
夏者伯克之轉語也部衆旣盛遂保安集延而王三月辛亥帕夏

陷英吉沙爾領隊大臣托克托布回務章京穆圖善伊明阿都司  
常順筆帖式文秀均死之四月塔城鐵廠集夫役千人赴城防守  
逆黨賄哈薩克助攻城官軍擊退之初塔城賊變蒙兵竄逸庫倫  
謀復仇夜殲二道橋回民男女三百餘人賊黨聞變嘯聚萬餘衆  
馳至額勒河蒙人懼有棍噶札拉叅胡圖克圖即察汗  
格根者西甯洮  
州土人也習黃教募化至塔衆議推主軍事乃簡額魯特官兵三  
千喇嘛一千漢民三百人率之援塔抵額勒河南岸戰賊敗之  
賊竄回塔札拉叅營西門外次日首先陷陣殲悍賊數人武隆額  
聞救兵至出城夾擊賊大敗圍解入城札拉叅欲乘勝進武隆額  
不從賊得完守備攻之不克伊犁遣兵援塔傷亡逸半武隆額敗  
二道橋陣亡營官穆隆阿敗還城札拉叅屢戰不利移駐南湖烏  
垣賊復東犯濟木薩得而復陷時新授巴里坤領隊訥爾濟與文  
麟駐守奇台五月丁巳賊來犯訥爾濟棄輜重遁巴城文麟與縣  
令恒頤亦潰逃城遂陷辛酉哈密台吉怕他諾什誘纒回從賊破



漢城辦事大臣札克當阿戰死閏五月訥爾濟奏全疆淪陷請飭  
大兵出關以圖恢復甲申文麟率滿漢兵三百人募增練勇進屯  
松樹塘以規復哈密六月戊申哈密賊來犯僞爲敗狀文麟督兵  
進戰遇伏而潰退至三塘湖癸丑賊長驅至大泉乙卯直逼城南  
依山而陣嚮晚賊營炊烟起代理總兵何瑄突出精騎千餘撲賊  
陣賊倉猝迎戰並分兵繞出城東爲夾攻之計滿營協領伊勒屯  
登城以大礮轟擊賊不支登陴者擊鼓噪之何瑄奮勇追殺奪獲  
軍械糧畜無數訥爾濟何瑄飛疏以

聞得

旨優獎惟文麟以規避不與並鐫級七月甲戌帕夏陷喀什漢城  
辦事大臣奎英死之全家皆殉奇台知縣恒頤督率勇目張和西  
勦連克奇台古城濟木薩三城乙亥進駐滋泥泉約綏來縣督民  
勇東進會勦妥逆令馬陞禦之阜康張和率衆由間道進八月癸  
巳朔與賊遇破其衆甲午賊復來撲又大敗之殺數百名奪獲大

燾一抬槍桿礮二十八尊房帳二十九頂車輛駝馬旂幟無數哈  
密賊大犯巴城乙未圍攻城東官兵登陴礮擊賊退紮三十里堡  
何瑄以賊勢甚張宜出其不意痛創之丙申瑄與協領慶壽率滿  
漢兵勇分三路進勦平明抵賊營力戰大敗追殺九十餘里俘斬  
七百餘名餘賊遁還哈密奏入得

旨獎叙乙巳恒頤率奇台勇目張和進阜康會孔才勦賊妥逆使  
馬陞禦之恒頤敗死於阜康奇台古城復陷張和奔巴里坤訥爾  
濟令張和收集戶勇以圖規復五年春正月壬午伊犁賊陷惠遠  
城將軍明緒死之全家皆殉參贊崇熙協領承謙佐領額勒津等  
率家人巷戰死兵民死者數萬賊虜前將軍常清總兵德明以去  
二月賊攻棍噶札拉參於南湖札拉參軍病疫不能戰退軍青格  
爾河戊午賊陷綏靖城武隆額及旗官十四人綠營趙榮均死之  
千總甘湧不屈賊釘其手足於門數日乃死妻女皆仰藥博爾果  
蘇全家皆殉額魯特蒙古萬餘人逃布倫托海札拉參置其衆於

烏梁海漢民亦多往依者伊犁之綏定廣仁瞻德塔爾奇四城相  
繼降賊惟拱宸堅守四閱月糧盡始陷被屠訥爾濟使佐領百喜  
督同勇目張和孔才率民勇進勦丙午敗賊於塘防門奪獲糧械  
無數庚戌百喜進駐木壘河迭次獲勝賊西竄招集奇古戶民萬  
餘人以固防守五月己未朔裁定新疆記作五月乙未朔誤哈密賊焚掠三鄉湖民莊辛  
酉攻巴城訥爾濟何瑄擊卻之丙寅天未明賊率馬隊萬餘直撲  
滿城槍彈密如驟雨防禦阿里屯傷胸不死彈中訥爾濟帽摩頂  
而過仍督兵戰不懈何瑄以綠營兵從外夾擊之賊始東竄追殺  
四十餘里斃數百名巴城一隅四面皆賊而士氣不衰惟苦饑無  
食耳回王伯錫爾使伯克斯林來巴城請兵收哈密並開糧道以  
餉巴軍六月己丑何瑄檄遊擊凌祥率馬步二千人往至松樹塘  
回王以青稞羊隻犒師凌祥策馬先進丙申抵南山口擊散沿河  
馬賊四千餘丁酉追至哈密復大捷毀賊營五會夏斯林進攻回  
城漢城望風逃潰立復哈密兩城奏入凌祥擢副將賞捷勇巴圖



魯旋署哈密協伯錫爾饋糧數千石以贍巴軍濟木薩縣丞陶珙之逃也

詔嚴拏正法珙思立功贖罪招集民勇收復濟木薩城時百善與張和孔才等屢戰輒勝珙請於百善暫攝奇臺知縣藉以辦糧旋烏城賊馬步八千餘東竄阜康陽與孔才議和而設伏於密林以邀之丙辰孔才爲所中全軍皆覆才以善騎脫百喜兵亦敗訥爾濟奏革百喜職留營効力十一月賊首馬陞蘇皮蓋率烏垣吐魯番匪衆七千東犯哈密伯錫爾說凌祥扼瞭墩拒賊未行賊入五堡凌祥倉猝出戰伯錫爾以纏兵數千助之辛酉戰於三堡賊少却壬戌軍至柳樹泉遇伏纏兵及安敦玉援兵千餘先潰凌祥簡巴城兵勇九百餘人鏖戰二日卒爲賊覆都司趙英傑遁歸巴城伯錫爾聞敗謂福晉邁里巴鈕日速飭衆伯克保侄孫帕仔爾台吉齋王印信赴巴城請兵我年近八旬死復何懼親率纏回二千戰賊頭堡兵敗王及帕仔爾均被執哈密復陷事

聞

上嘉伯錫爾之忠奮凌祥趙英傑革職拏問哈密再失巴城兵食并乏勢益危自四年六月

上諭烏魯木齊提督成祿伊犁參贊聯捷統各營通道出關赴哈  
援勦瑄並

奏請塔城參贊李雲麟速率蒙兵援巴里坤迄不應瑄遂檄孔才張和來巴備調遣先是孔才有衆三千雲麟檄留精壯五百人餘悉逐遣衆流爲盜雲麟奏孔才反有

詔嚴拏才懼不敢來巴獨張和率數十騎至十二月乙巳哈密馬賊二千餘攻巴城丙午瑄飭遊擊陳升恒偕張和擊賊二道河伊勒屯率滿兵助之賊大敗東逸是月訥爾濟目病

奏請以伊勒屯攝領隊

詔許之六年春正月伊勒屯奏巴城糧食賴安西哈密接濟自哈密再失糧運不通巴城人相食滿營男婦餓斃三百餘口然賊來

猶忍饑力戰若不速設法拯而救之再逾數月全城悉餓殍賊至不攻自破矣李雲麟所部民勇及棍噶札拉參蒙兵共十二營勢足赴援而坐視不前倘巴城一失新疆大局尙可問乎前者雲麟欲合蒙兵進攻古城以規復烏垣哈密賊聞之必西竄夫使賊果西竄而纏回之踞哈密自若也且雲麟不急合巴城兵力共圖哈密與成祿聯爲一氣而必進就一無兵無餉之古城未見其得計也况以烏合之蒙兵民勇攻深根固蒂之烏垣孤軍深入後無援兵其勢必敗請飭雲麟札拉參先赴巴城與成祿東西夾攻哈密然後再圖烏垣不難矣得

旨嚴催而雲麟以哈薩克十餘萬勢將內犯宜先顧北路完區爲辭伊勒屯何瑄復奏雲麟特以哈薩克內犯爲恫喝之言坐視不救更阻札拉參不得獨前揆其居心無非藉規復烏垣爲名以圖虛糜餉項而已奏入

上諭巴城有失惟李雲麟是問而延宕如故伯錫爾旣被執賊監



禁之是月賊翰曰奚爲赴巴請兵伯錫爾罵曰請兵者欲剗滅爾  
狗彘耳立起奪矛刺殺二賊遂被害其妾回女也亦罵賊死賊以  
馬躡其尸夏斯林與伯克阿布都拉巴海斯底克均被殺何瑄具  
疏以

聞

上追封伯錫爾爲親王賜卹有加禮王妾旌表並飭哈密建專祠  
夏斯林等皆附祀二月己酉何瑄檄茂林與千總趙萬海勦哈密  
賊復其城而以張和駐兵守之奏入何瑄以提督記名回逆馬萬  
信與纏逆蘇爾坦有隙潛結烏垣賊助已敗而被殺三千餘蘇爾  
坦遂雄長伊犁湖軍記此  
事在五年三月孔才率衆自首何瑄

奏請帶罪自効

詔允之令紮哈密三堡與張和犄角徐學功之營寨南山也漢民  
依附者日衆數敗賊賊憚之謀悉衆攻圍南山學功以兵寡不敵  
移紮呼圖壁之芳草園賊帥馬官約烏垣馬陸夾攻學功退屯河

西之化樹林再移營於博羅通古伺隙狙殺回衆賊益結六部哈薩克以圖學功六月哈薩克三音不拉王梧桐旂王黑子王率衆數萬來攻學功堅壁不戰時出輕騎掠其牲畜夜則伏兵敵營以鐘鼓擾之相持月餘賊漸疲懈七月壬申學功開壁出戰斬三音不拉王於陣八月癸未復擒殺梧桐旂王賊衆潰奔學功追殺至雅爾頭台哈衆死傷萬餘獲牛馬無數學功兵勢復振九月癸酉馬陞率賊衆攻學功以馬隊三百伏山坳夜以步隊二百潛搗賊壘賊驚潰學功以馬隊蹙之死傷大半馬陞逃免與學功乞和且允月饋之餉學功佯允以書覆之而故投其書於馬林馬林者妥逆之腹心也得書大憤遂舉馬泰爲總帥以間之時喀喇沙爾蒙古汗王爲纏賊所困學功馳救之於庫爾勒七年春二月僞帥馬泰復犯哈密張和死之何瑄伊勒屯飛飭革弁趙英傑勇目田樹青往援癸卯敗賊於城西甲辰協領達三布副將芮林遊擊趙萬海孔才合擊賊敗走徐學功乘烏垣空虛潛兵襲之立復滿

城馬泰回兵來援連戰數日殺賊千餘陣擄僞南方元帥馬環卒以兵力單少不能制賊四月學功仍棄城回南山馬泰約各路纏回共圖學功六月戊申吐魯番僞帥馬忠纏王和札依提暨僞帥馬官馬金劉心春各以兵來會圍之南山馬泰率大股賊出中路進擣學功結蜈蚣陣以禦以精壯數百人爲游擊之師步隊居中馬隊環外賊前則退賊退則前相持十餘日賊力疲出奇兵截之賊大敗陣斃僞帥馬占奎馬全馬生福其兄學信亦於是役而亡文麟於五年授爲哈密辦事大臣寓涼州募勇

詔與成祿迅速出關剿賊七月文麟抵哈密妥逆僭號事皆決於馬陞妥逆惡之嗾馬官縛至斫殺之並戮其黨十餘人於是賊首互相猜其勢漸衰

西陲戰略六年七月妥逆忌馬陞令馬泰與牙伯虎戰於庫車大敗歸與馬陞謀削妥逆僞號事洩妥逆併余祿馬如智等悉殺之案馬泰之戰安夷在九年戰略蓋併叙之也

八

年秋八月哈密幫辦大臣景廉抵任賊數百騎東竄五堡文麟檄孔才與營官張忻蔣富山禦之擒匪首科有冲誅之賊敗走九月甲戌賊犯二堡乙亥孔才張忻蔣富山分三路合擊戰良久運糧



委員魏忠義至伏兵於草湖孔才率死士八百人橫衝賊陣賊少却伏兵起從後蹴之賊衆大潰是夜復來襲營見軍備嚴不敢入忠義策賊必再至乃伏礮隊於兩掖以待賊果率衆猛撲忠義麾馬步入營以進戰方酣張炘趙萬海以大礮夾擊賊始不支會風雨大作賊自相踐踏死者無算忠義乘勝進抵柳樹泉直搗賊巢斃賊六百餘賊潛出斂尸復敗之

賊定新編記丁巳伏兵敗賊戊午進搗賊巢壬戌復敗斂尸之賊案九月己巳朔並無丁巳戊午壬戌諸日丁巳當係丁丑戊

午當係戊寅壬戌當係壬午蓋賊自犯哈密始經此巨創爲之喪膽是年安夷以兵至

庫車殺回目黃和卓九年春二月賊竄奇台勇目鄧生玉馬進福

張著均結民團自固賊不得逞三月僞帥馬仲馬泰擊安夷敗於

阿爾城馬仲奔吐魯番帕夏以兵圍之是月俄羅斯有盜馬逃匿

伊犁者俄人索之不能得繼逆復以兵逐之五月俄人益兵來戰

破拱宸城繼逆大敗戊寅下瞻德己卯庚辰降綏定惠遠各城悉

爲俄踞矣十月馬仲以吐魯番降帕夏帕夏令仲導兵取烏垣安

逆不能敵亦以城降執馬泰送南疆削安逆僞號以馬仲爲阿奇

木總管迫回民皆薙髮易服馬泰逃自南疆至鹽池徐學功執而殺之閏十月乙亥馬進福率定西營截勦竄回戰死文麟以其弟進有領其軍科布多參贊奎昌奏綏來縣團勇趙興體殺賊有功詔賞花翎守備銜十年夏四月僞總帥馬官復攻學功於南山戰於靈應台學功夜劫其營斬馬官賊舉馬忠爲僞總帥徐學功約孔才攻奇臺沈廷秀攻昌吉趙新題攻瑪納斯而自攻烏垣同時進兵學功一戰復滿城進圍漢城六月各路兵皆敗馬忠由瑪納斯援烏垣戊寅賊至倉房溝學功聞知軍溝南登高阜以瞭賊兵連互數里學功僅馬步五百餘人乃召學策謂之曰賊壓我軍而陣我一移動全軍覆矣我與賊中隔一橋若突過此橋搗其中心幸或不敗弟素勇敢成敗在我二人耳孰先過此者學策曰弟氣已怯矣學功曰若然則我先進吾弟但見賊隊亂則速以兵繼之賊倘弗動兄死必矣弟卽走保南山勿同燼也學策掣韁諫曰兄勿冒進容再計之學功方欲有言賊已逼乃以佩刀斷韁縱馬進

及橋賊槍彈如雨注學功側身伏馬肋旁乘煙塵而馳與忠肩相摩以馬箠擊其首忠墜生縛之賊衆大亂爭逃學策率兵繞出賊前扼要路擊之殺賊五百餘人俄人聲言代收烏垣

上知其謀授景廉爲烏魯木齊都統率兵規復景廉進軍巴里坤馬忠之子人得與妥逆交惡冬十月馬人得導帕夏圍攻僞王城帕夏約徐學功相助妥逆傾巢出戰學功與帕夏合擊之妥逆大敗遁綏來十一年春正月帕夏據烏垣下令回漢薙髮易服徐學功克昌吉呼圖壁進逼漢城說妥逆合力拒帕夏帕夏調賊衆來援至達坂城金貴拒之五月丙戌兵敗而死丁亥學功戰於城南學策中礮陣亡帕夏屠烏垣回漢遷其壯者於南疆殺僞總帥馬明之兄馬元明銜之率其黨踞古城與帕夏相持陰圖投誠時以芻糧佐大軍學功數攻烏垣不利回逆有欲縛獻學功乞和者學功覺之己丑退屯沙山子

徐學功自記此  
事在十二年

古城統領張玉春攻烏垣六月

壬申戰於古牧地敗績營官沈廷秀唐漢雲馬興業死焉玉春重



傷馬明救之得免景廉遣使招撫馬明令質妻子不果降八月哈密幫辦大臣錫綸至巴里坤言於景廉曰烏垣賊勢非兩路夾攻不破西路民團無大員董率難萃易渙榮全遠在塔城兵力單薄布倫托海難民半爲札拉參遣轍兵勇若招集成旅會合沙山子兵民扼要以駐既可夾擊烏垣又可杜俄兵東犯廉甚韙之令其擇要駐軍且屯且戰安夷旋斷古牧地汲道襲破其城徙馬明南路以其黨駐之定西營幫辦孔兆華偵知烏垣賊欲乘機襲古城孔才亦以回民貿古濟奸而險恐爲賊應十一月庚子才殺回商二百餘人移兵防紫泥泉擒賊目數人戮之是冬俄人糾纏回僞爲赴綏來貿易者將乘機襲烏垣至石河綏來西八十里徐學功率兵要擊之破其衆奪獲駝馬洋貨並俄鈔二萬兩俄人始不敢東犯烏垣之不陷於俄者學功之力也十二年春二月烏魯木齊提督成祿被逮入都自巴城被兵何瑄訥爾濟等疏請成祿赴援章十數上廷旨數嚴催卒逗遛關內至是奉

旨拏問四月景廉進軍古城檄調徐學功

湘軍記云十一年春景廉招學功至

面詢

賊情學功輕騎往古城景廉奏保以遊擊補用委署昌吉遊擊留

數日遣歸安夷偵學功出以兵襲南山家屬積儲屠擄一空景廉

聞之飛飭黑龍江營總伊勒和布定西營統領田錫禮以勁騎三

百援之帕夏遁還吐魯番是月白彥虎自西甯出竄攻安西敦煌

玉門諸處閏六月辛丑彥虎竄哈密沁城七月辛亥犯哈密魏忠

義禦之大橋西失利營官劉珍郭天保田樹青王復興陣亡景廉

檄吉爾洪額沙克都林札布孔才等督兵往援八月乙未與賊遇

會文麟合兵剿之殲賊數百是夜賊陷回城俘福晉去辛丑大軍

進攻賊棄城遁南湖乙巳白彥虎復敗西竄入烏垣附合安夷分

兵擾吐魯番掠瑪納斯及巴屬之紅柳峽古城戒嚴是年安明死

於瑪納斯十三年春二月辛卯孔才興祿剿賊於紫泥泉壬辰戰

於西泉斬逆目蘇保沅馬得和馬兆魯李遠王元皆白逆捍黨也

三月正白漢軍都統金順涼州副都統額爾慶額桂錫楨率馬步

隊先後出關廣東陸路提督張曜進屯哈密大興水利墾地二萬畝以佐軍食五月賊竄西湖辛亥徐學功剿賊於綏來賊劫馬橋商貨營官焦生有追還之六月庚辰孔才敗賊三台賊以四千餘人夜犯關城景廉飭興祿金永清倪敬脩往援壬午遇賊於二工河擊走之癸未賊復至戰於柳樹河孔才田錫禮倪敬脩率馬隊居右金永清率步隊爲中軍游朝勝以馬隊伏其左戰至午賊大敗殺賊五百餘賊衆北竄沙山甲申焦生有伏馬隊於林中令哨弁白彥存誘之斃賊逾半哨弁李萬隆陣亡七月丙午呼圖里克賊騎東竄哨弁羅讓陳正基伏中路敗垣擊之擒斬逆目金尙保己未戡定新疆記作乙未誤昌吉賊竄芟芟槽營官姚百福督隊追剿逆目黑寶才中礮傷遁八月授景廉爲欽差大臣督辦新疆軍務九月關內肅清回逆余世龍竄出關擾哈密勢甚猖獗徐學功誘世龍於瑪納斯之三道廠河沿擒之

詔金順迅赴古城會景廉規復烏魯木齊穆圖善赴安敦玉以壯



聲援張曜宋慶馳至哈密會文麟明春剿賊各軍糧餉則左宗棠源源接濟之十月金順至玉門四道溝進屯巴里坤時景廉議三路規取烏垣自與金順由古城趨古牧地張曜趨吐魯番錫綸趨瑪納斯同時並舉使賊不得相援救時

朝議有謂西域不能守請移西征之餉以助海防者光緒元年春二月大學士陝甘總督左宗棠奉

旨垂詢西域情形宗棠奏曰停兵節餉無益於海防而大妨於邊衛因上剿撫兼施糧運兼籌之策復密疏景廉方正有學病在泥古金順平時粥粥若無能者而臨敵奮勇可恃若以景廉之任畀金順節制各城領隊辦事大臣庶於敵事有濟矣未幾

詔景廉補正白漢軍都統回京左宗棠以欽差大臣督辦軍務金順爲烏魯木齊都統副之陝西巡撫譚鍾麟督西征餉事布政司裕寬陝安道沈應奎兼管緝台宗棠奏起前陝西巡撫劉典赴蘭

詔劉典以三品京堂候補幫辦陝甘軍務時景廉頓兵古濟銳意屯墾飭孔才等六營於三台開渠屯田甲申賊突犯三台營官李發桂以三十騎巡渠鎗傷其右脇叱衆力戰孔才馳援之賊始退發桂尋以傷亡事

聞

賜卹金順由巴里坤進軍古城與景廉會奏回逆以烏垣爲老巢分布賊黨於昌吉奇台各城安夷盤踞吐魯番情形叵測大兵進剿勢必互援或由捷徑窺我後路以圖牽制請調烏台駐防黑龍江馬隊西紮沙子蓋並徙蒙古遊牧內地以避其鋒

上飭宗棠金順妥籌調度宗棠疏言籌軍糧理兵事必先分別兵農責兵以戰責農以耕而後餉可裕兵可精也奏入議行七月乙未朔景廉回京金順接統其軍汰三十餘營爲馬步十九營秋八月宗棠奏三品卿銜署西甯道劉錦棠志慮忠純請令率所部老湘營從征宗棠以總理行營事務委之九月金順以濟木薩西起

沙山子以紫泥泉爲赴沙山子要路飭孔才率定西馬隊五營暨  
健銳一營駐之副將王洪順率靖邊營進紮二道河方春發率英  
字營會總兵桂錫楨扼守三台九月辛酉烏垣昌綏逆回合安集  
延大股賊犯沙棗園下六戶地營官趙文斌沈廷輝迎擊徐學讓  
繼之張文英設伏以待戰合伏起賊衆弗支參領壽凌等以馬隊  
蹂之賊狂奔趙文斌手斃回酋武觀武犂兒於陣時自烏垣以西  
至庫爾喀喇烏蘇賊出沒紛擾未受大創

上飭伊犁將軍綦全

時駐城

與金順聯絡聲勢乘機兜剿十一月總兵

馮桂增統西征捷勇三營駐沙灣與額爾慶額兵相犄角沙灣在  
綏來西北有徑通布倫托海上年白逆分股石滌塔由此竄出故  
防之是冬劉典以病辭幫辦陝撫譚鍾麟奏言典素與諸軍相習  
若令駐蘭州後路督臣得一意前敵迅赴戎機早歲一日之功卽  
早省一日之餉

詔從劉典自湘西行二年春正月左宗棠檄西甯道劉錦棠四川



提督徐占彪率湘蜀各軍自涼州西進額爾慶額聞白逆糾瑪納斯賊謀東犯哈密古城乃約馮桂增徐學功潛襲其城丙寅額馮兩軍抵大河廠不待徐軍至夜半先薄北城下桂增舍騎由西北角潛登殺守門者以入賊驚起退伏東隅額軍繼進陣斬翟老四嘎一兩逆目天甫明賊以大礮來攻桂增率所部巷戰斃賊無數潰圍出尋額爾慶額不見再入再出者數次力竭被擒罵賊死陣亡弁勇二百餘名學功聞敗卻回宗棠奏言馮桂增額爾慶額冒險貪功學功雖未馳救惟約日會攻

戰定新疆記云額馮與徐學功約以正月丁卯合攻案正月癸巳朔無丁卯日

未定時

刻馮先進非學功所知得

旨學功由金順摘去翎頂免議額爾慶額左遷古城領隊桂增如例議卹二月庚午三品京堂劉典至蘭州宗棠以善後事畀之癸未禡牙啟行兵事委劉錦棠相機而進徐占彪馬步四營駐巴里坤張曜馬步十二營暨宋慶留八百人扼守哈密以防吐魯番賊

東犯時

朝議以遠征勞費欲封帕夏爲外藩英使威妥瑪復爲之請宗棠言不克烏垣無總制之地且官軍出塞宜先剿北路而後下南路具疏詳切陳之三月乙巳宗棠次肅州宗棠令漢中鎮譚上連甯夏鎮譚拔萃陝安鎮余虎恩諸軍分起遞進蓋以安西哈密中隔戈壁水泉不足千人飲故也四月錦棠率大軍出嘉峪關命諸將暫駐哈密俟糧運集會搗賊巢瑪納斯賊分赴草地擄掠並擾布倫托海時俄國解送古城軍糧悉被劫宗棠檄領隊大臣錫綸赴沙山護俄運以桂錫楨馮以和並吉林黑龍江馬隊各軍隸之調徐學功馬步四營歸其調遣孔才扼紮沙山子衝賊來犯馬橋六戶地才遣參將杜生萬擊走之五月甲辰孔才與黑龍江馬隊協領克希克圖杜生萬進攻瑪納斯乙巳賊騎數百突出南城爲孔才擊退丁未副將和振興把總馮魁以兵來會築壘於城西北十里墩賊數來撲噪而索戰各軍均靜伏不動癸丑賊復挑戰殷紹祿邊生有列陣以出孔才克希克圖伏兵城西北樹林戰方合伏

兵四起孔才等橫衝中堅以短兵相接賊衆大亂陣斃執旗賊酋一人是月譚上連駐兵巴里坤有馬賊由布倫托海竄過古城上連追之賊遁吐魯番上連遂分兵屯茂茂台色畢口大石頭三角泉以護運道率兩營前進錦棠抵巴里坤備糧哈密閏五月宗棠奏言欲搗賊巢必先攻取古牧地以撤烏垣藩籬檄錦棠進師阜康儲糧屯以當賊衝六月錦棠與金順同抵阜康

抵紫泥泉丁卯抵阜康案二年六月庚寅朔並無辛酉壬戌丁卯之日

錦棠駐兵九運街金順駐兵阜城去古牧地九

欽定新疆記六月辛酉錦棠與金順由濟木薩拔隊而西壬戌

十里金順檄總兵胡飛鵬助孔才攻瑪納斯約期齊舉白彥虎聞官軍大出糾土回出駐古牧地以拒官軍安夷亦遣纏回助戰由阜康至古牧地皆戈壁中間黑溝驛上黃田有水泉賊築層壘嚴守以困官軍錦棠與金順謀潛師夜襲己酉令軍士佯掘井戈壁庚戌夜半直趨上黃田黎明已至錦棠金順率余虎恩薩凌阿等分左右路進同踞山岡待譚和義携開花礮出中路進攻賊倉卒迎戰余虎恩等以馬隊下山馳擊賊合步隊來拒譚拔萃譚上連



董福祥以步卒直搗中堅馬隊分左右抄之賊大敗錦棠與金順躡踪追擊徑至古牧地城下賊不及入繞城而走城內賊突出來拒諸軍乘銳擊退之以城堅難驟下仍駐軍上黃田壬子官軍進圍古牧地錦棠軍東北金順軍東南白逆先派回魯馬明守古牧地帕夏疑其與官軍通以王治金中萬代之癸丑復遣夷目阿托愛率騎賊來援戰敗之破南關城薩凌阿陣斬黃衣魯一人賊衆大敗阿托愛棄馬跳遁古牧地城小而堅賊竭力死守錦棠金順乃築壘困之增建礮台高城丈餘昇開花礮俯擊之乙卯北城西城圯各數丈丙辰東城亦圯賊奮力堵禦丁巳錦棠金順檄將士囊土填壕由缺口進攻以大礮環擊之丁巳南城復大圯賊衆潰亂不及遁錦棠自東南入金順自西北入守城六千餘賊盡殲焉擒斬賊目王治金中萬暨陝回目馬十娃安夷賊帥紉塞奇白逆以未在城倖免搜獲烏垣逆目馬人得與王治書言烏垣精壯盡至古牧地三城防守乏人南疆兵亦無至者三城者烏垣迪化州

及妥逆所築之王城也錦棠與金順謀乘勝擣虛而進戊午錦棠先發金順繼之馬人得以古牧地已失與白逆議南竄方部署間而官軍已至相率同奔錦棠飭余虎恩等馳往追擊譚慎典自北城入分隊入僞王城金順入鞏甯城三城同時皆復錦棠金順籌善後諸事以袁堯齡暫攝迪化州事並約張曜徐占彪會師規復南路帕夏援兵五千餘至達坂距烏垣二百里聞敗不敢進於是昌吉呼圖璧瑪納斯北城踞逆先後棄城南遁北路畧定惟瑪納斯南城未下捷

聞

詔賞錦棠騎都尉世職譚拔萃譚上連余虎恩譚和義席大成均賞雲騎尉世職黃萬鵬蕭元亨均賞穿黃馬褂其餘將士進秩有差陣亡各員弁優卹如例孔才之進薄瑪納斯也屢攻未下是月榮全檄廣州副都統福珠哩及徐學功皆來會攻福珠哩築台北關昇大礮轟城賊懼北城逆首于小黨夜遁七月己未朔逆日黑

寶才亦南竄遂克瑪納斯北城是日金順師至昌吉賊衆西竄庚申劉宏發方春發追賊於蘆草溝賊折奔東南山谷與金順軍遇金順令沙克都林札布繞出賊前穆通阿龍得勝躡其後王寬薩凌阿分兩旁抄之沙克都林札布麾騎直前鎗矢齊發順喜大呼陷陣賊敗死無數馬元駛逃穆通阿擊以鎗彈貫馬腹蹄而顛驍騎校雙喜擒之龍得勝追賊至頭屯河賊爭渡踐溺聚而殲之獲輜重駝馬器械無算是役也惟佐領永林一人陣亡幸酉劉宏發進軍呼圖壁距城十里壬戌賊酋楊大成率眷屬輜重謀遁南山而自率馬步千餘來拒戰宏發身先搏戰陣斃百餘馬隊復潛出賊後攻之賊不支繞城而遁遂復景化城錦棠下令搜山甲子譚和義陶生林黃萬鵬余虎恩譚拔萃譚上連分勦東山大小鹽池墩柴窩堡各處匿匪賊眷屬輜重悉南徙留精壯守達坂城時白逆踞南山小東溝口謀俟官軍至潛師出古牧地阜康襲我後路錦棠偵知飭余虎恩譚拔萃扼鹽池柴窩堡防賊戊辰錦棠進勦



小東溝口賊至則賊已徙金口峽矣白逆率黨竄托克遜往依安  
夷官軍仍返烏垣癸酉金順進軍瑪納斯施巨礮城圮丈餘諸軍  
蟻附而上賊乘高擲礮石卒不克登陣亡總兵李大洪熊佑林傷  
參將陸輝方春發八月庚寅夜馬玉崑潛登西北角樓殺守賊十  
餘人賊衆驚覺復下辛卯復登適角樓內火藥發玉崑燄傷而退  
劉宏發復築三壘高出城以槍礮附闕擊之賊增築女牆排列油  
槍拒守夜則以油灌薪燃之光曜如晝官軍屢攻不克衆益憤怒  
己亥戡定新疆記  
作己丑誤劉宏發冒槍彈登城飛丸斷其一指傷而墜馬玉崑  
繼進諸將肉薄以升顛而復上者數次卒不得入遊擊胡耀羣營  
官張大發杜生萬司世道邵芝楊占魁均死城下金順飭諸軍圍  
以長塹潛掘隧道其下乙巳劉錦棠復遣羅長祐譚拔萃董福祥  
來會攻九月戊午朔方春發由地道轟城城圮僞帥韓刑膿督衆  
禦之衆不得上韓刑膿中礮死己巳地雷復發裂城二丈餘馬玉  
崑率諸軍噪而入忽逆風作烟障不見人賊乘勢來撲提督楊必

耀中槍殞孔才拔幟繼進亦中彈墜馬官軍死者九百餘人賊乘  
夜越塹來攻湘軍營官湯秀齋擊卻之獲賊三人訊知賊以海晏  
爲僞帥多謀而勇然糧盡援絕亦將遁矣丙子海晏乞撫金順徐  
學功諭繳馬械獻逆首戊寅平明賊衆三千餘突出西門婦穉居  
中悍黨持槍左右夾護金順知其詐嚴陣以待學功諭之降僞帥  
何祿麾衆發槍礮學功直前斬何祿大軍環而蹴之盡殲其衆僞  
帥黑峻知不可脫以槍自殺蓋自軍興以來未有如是之鉅戰也  
金順督軍入城擒僞帥馬有才海晏王奇玉馬受等磔之戮安明  
韓刑膿黑峻尸於市初白逆依附帕夏帕夏以女妻之白逆復嗾  
土回合帕夏拒官軍且謀伺間逃迨烏垣敗後帕夏踞守托克遜  
白逆與于小虎來投帕夏意輕之命率其衆傍吐魯番各城協力  
防守十月金順回駐昌吉孔才徐學功等分屯瑪納斯呼圖壁各  
要隘時大雪封山諸軍不能踰嶺而南宗棠議明春三路進兵規  
取南路帕夏知官軍將南下與白逆移築達坂城於兩山之間命

大通哈守之以次子海古拉守托克遜築兩城互爲犄角自居喀喇沙爾以爲策應三年春宗棠檄張曜由奇克騰木進闢展以副將武朝聘副之徐占彪出木壘河以秦玉盛副之夾攻吐魯番檄劉錦棠由烏垣趨達坂城以總兵章洪勝方友升桂錫楨各軍副之三路並進三月丁巳朔錦棠啟行己未抵柴窩堡夜未半援軍起五鼓會達坂城下城外故有草湖賊引水環城以阻官兵之路諸軍銜枚疾趨未明抵城下泥淖縱橫深及馬腹余虎恩陶生林夏辛酉率馬隊掠流而過列隊城左山上譚上連率步隊列城後山上黃萬鵬等率馬隊彌縫兩軍羣賊方高臥未起黎明瞥見官軍環列城外驚爲從天而下始發礮諸軍屹立不動錦棠策馬繞城走誘賊出擊賊不出遙擊以槍斃錦棠乘馬易馬而前卒巡城一匝辛酉托克遜賊騎五六百由山後來援余虎恩率馬隊禦之賊衆潰逃賊知援兵敗謀突出遁錦棠飭諸軍嚴備壬戌築礮台山上侯名貴莊偉以開花礮環轟之誠圮數處尋礮中藥房火發



開花子彈同時並炸人馬碎裂羣回驚讐爭奮門出走官軍遏之  
錦棠使人當門而呼曰縛異服者賞於是諸回頭目悉就縛大通  
哈愛伊德爾胡里代帕夏乞恩願縛白逆以獻繳回南八城贖死  
錦棠允其致書以招帕夏釋安集延南八城纏衆及土爾扈特種  
人悉勿誅給衣糧縱歸降回給牛種就達坂舊城耕種復業夷回  
大歡丁卯進搗托克遜白逆與海古拉聞達坂敗耗方圖西竄適  
錦棠軍到賊焚積聚棄城走追殺無算立復托克遜城被脅諸回  
二萬餘乞降錦棠令交馬械以候安插張曜徐占彪之進攻吐魯  
番也曜飭孫金彪率五營先進占彪遣何玉超宋賢羣黃祖福會  
於七克騰木步勇先至踰北壘入賊方酣睡驚而逸甲子大軍會  
攻斃紅衣賊目羣賊不戰而奔乘勝追至闢展賊望風遁金彪擒  
安集延賊目才米牙斯斬之安夷聞敗集衆守魯克沁勝金台諸  
處戊辰占彪敗之魯克沁金彪躡賊至勝金台悍賊數百蠡擁出  
金彪麾軍擊敗之是日兩軍會哈拉和卓城東己巳至吐魯番賊

列陣以拒占彪金彪合擊之適錦棠遣羅長祜等自北路至會軍一戰立復滿漢兩城賊黨西奔阿奇木馬人得乞降奏入劉錦棠賞雙眼花翎張曜賞一等輕車都尉徐占彪孫金彪均賞頭品頂戴餘獎賚有差陣亡總兵譚聲俊等

賜卹時劉徐兩軍有違言宗棠乃檄占彪回屯巴里坤張曜經理哈密吐魯番善後事宜而以錦棠獨任進攻之事五月戊辰哈密回日和木牙斯來自帕夏營具言自官軍克吐魯番後帕夏日夜憂懼纏回受其虐者均思乘機報復帕夏已於庫爾勒仰藥死其長子伯克胡里次子海古拉兄弟爭立伯克胡里殺其弟自立保南疆而王回夷守庫爾勒推白彥虎爲首白逆踞開都河西岸覬入俄羅斯留其黨叛弁何某統兵三千守喀什噶爾而已宗棠奏聞

上諭以速殄白逆毋任再竄宗棠策官軍進逼白逆必圖遠逸其路有三一西竄庫車阿克蘇一東竄羅布淖爾以入藏一北竄伊

犁東西兩路科難免脫惟北竄之路昌吉綏來地勢平行道路紛歧非預爲堵剿不可遂密檄錦棠張曜等嚴爲布置以遏奔突秋英使威妥瑪議割喀什噶爾以保護安集延立國請於我政府宗棠奏曰英人袒庇安夷蓋彼陰圖於印度增一屏障撤我藩籬不可許也前聞英人有遣淑性赴安集延之說臣已馳告錦棠等彼如論回疆之事則對以奉

命討賊他非所聞如有別議請赴肅州大營彼來臣自有以折之上嘉其奏七月錦棠派提督湯仁和進駐蘇巴什阿哈布拉八月戊申錦棠率諸軍次曲惠命金虎恩黃萬鵬傍博斯騰淖爾西行出庫爾勒之背錦棠由大路由開都河而進約期相會白逆壅開都河水東注以灌官道沮洳百餘里官軍繞路斜行紆折以達九月癸丑朔錦棠師至喀喇沙爾城中水深數尺廬舍蕩然乙卯逾哈爾噶阿滿溝擒賊騎訊知白逆已遁庫車矣庫爾勒城空無人掘得窖粟數十石用濟軍食錦棠偵白逆脅纏衆走布告爾乃選



精騎二千人疾進至洋薩爾堡見遣火急追之及於布告爾賊騎千餘鳴鼓返旆來戰黃萬鵬譚拔萃擊破之官軍躡後窮追甲子復及之賊衆數萬而持槍矛者僅千人餘則皆被脅難民也錦棠令曰持械者誅餘勿問賊委難民狂奔乙丑至托和館聞白逆已竄庫車兼程而進夜五鼓抵庫城白逆方脅衆西走未及整隊錦棠麾馬隊衝之賊遂奔復庫車城是役也自庫爾勒六日夜馳九百里收復兩城拔難民以十萬計奏入得獎陣亡提督王慶福等皆

賜卹丁卯錦棠至拜城回衆開城悉就撫白逆先一日西竄錦棠留方友升鎮之飭士卒蓐食乘夜而進戊辰抵銅廠賊方渡河官軍薄之賊思決死鬪圖脫乃麾衆列陣白逆居左安逆居右鎗礮環轟聲如貫珠官軍分張兩翼迎之酣戰數時有貂衣駿馬賊指揮而戰夏辛酉怒馬突陣直前搏之捽於馬下賊衆駭愕諸軍左右夾擊賊衆大敗死傷無數貂衣賊者安集延分踞阿克蘇之胖

色提要路打什也庚午至札木台解鞍小憩進薄阿克蘇遙見城頭槍矛森立西南塵起蔽天日詢知城內回酋阿布都拉滿謀投誠逆黨縛之西去蓋其城人嚴守以待官軍者也錦棠至膜拜馬前乞撫遂復阿克蘇官軍駐漢城遣譚慎典迅追白逆及於胡馬納克河擒斬悍賊四五百人白逆棄其眷屬而遁奪哈密回王瑪哈邁特母以歸白逆喉安逆竄葉爾羌自走烏什冀分兵力緩死錦棠檄黃萬鵬張俊急趨烏什夏辛酉譚慎典自西來會之辛未渡胡馬納克河俘賊首馬有才等壬申擊之烏什城東敗之遂復烏什癸酉追至阿他帕什阻戈壁而還錦棠以大憝漏逸乞免甄錄

上念湘軍冒寒遠征一月馳三千餘里

詔劉錦棠晉秩三品京卿諸將獎叙有差十月癸未張曜由喀喇沙爾進庫車庫車迤南曰沙雅爾其酋麻木爾者獲之達坂城乞降釋歸既而復叛附安集延官軍既克庫車乃挈黨竄哈番地居

阿克蘇西南四百里丙戌麻木爾謀襲官軍錦棠率席大成等往  
攻之辛卯抵巴河賊西竄屈烏克拱拜阻河以拒官軍亂流以渡  
賊槍礮齊下譚慎典等麾軍冒彈而進軍中有識麻木爾者縱槍  
擊之穿其頰而顛其黨挾之以走遂大潰錦棠還軍阿克蘇和闐  
回目呢牙斯聞官軍西進立反正並率衆圍葉爾羌以應官軍伯  
克胡里聞之命逆目阿里達什守喀什自將精騎由英吉沙爾遶  
出和闐之南以襲之呢牙斯回戰不利遂失和闐伯克胡里之出  
也前喀什守備何步雲率滿漢兵弁之陷賊中者乘機奪據漢城  
阿里達什急保回城約白逆于小虎共攻步雲伯克胡里亦由葉  
爾羌率悍黨來救賊知漢城糧儲彈藥俱乏急攻之輪車雲梯同  
時並進步雲晝夜捍禦多死傷勢殆不支乃飛書乞援兵錦棠初  
議取葉爾羌嗣以喀什被圍急又聞英人有爲安夷代乞喀什之  
說乃分兵三路以進余虎恩桂錫楨由瑪喇巴什進黃萬鵬由烏  
什闡展進錦棠率譚拔萃羅長祐進駐巴爾楚克扼和闐葉爾羌



之衝以備策應十一月壬子朔錦棠至阿郎格爾甲寅抵葉爾羌  
賊已先遁飭董福祥分道徇和闐余虎恩取道瑪喇巴什城中賊  
千餘不虞驟至皆驚遁城東有橋八丈餘賊毀之以阻官軍虎恩  
至命士伐木疊橋不日而畢渡甲子至牌素巴特黃萬鵬亦至喀  
城北麻姑木夜漏三下同抵城下虎恩軍中鳴鼓角士卒潮湧而  
進賊候騎覘狀馳歸大呼曰大軍至矣白逆與伯克胡里皆分竄  
留悍黨以拒大軍賊驚慄相率逃逸惟僞副帥王元林率千餘騎  
嚴整不亂直撲中軍虎恩麾諸軍合圍之一卒持矛直前刺王元  
林於馬下賊始潰亂悉爲官軍所殲尋北路大軍畢集虎恩由城  
東轉戰而前何步雲憑漢城上呼噪助之賊洶懼四逃官軍分路  
追殺十餘里尸骸枕藉雪地皆成殷色城圍立解並復回城蓋賊  
據喀什者已十四年矣乙丑余虎恩出正西追伯克胡里及于小  
虎黃萬鵬出西北追白逆丙寅虎恩及賊於明瑤路桂錫楨夏辛  
酉繞出城前虎恩率蕭元亨趨進前後夾擊敗之陣擒于小虎適

報伯克胡里昨日過此地近俄國之窩什虎恩自討追之不能及而白逆竄西北必道經恰哈瑪由明瑤路北出馳三百里可橫截其前遂舍之以邀白逆丁卯至芟芟槽與萬鵬軍相遇賊後隊三百餘人擒僞帥馬元陣斬其副白彥龍兩軍再進五十餘里至恰哈瑪過此則俄界矣萬鵬等更前進三十餘里俄屬黑利黑斯數百騎馳出山谷截之曰此俄地也頃有中國人過此已遠矣虎恩太息頓足收隊而還庚辰董福祥徇和闐賊出奔追擊之擒安夷頭目達的罕條勒及其黨三千餘人羅長祐駐軍葉爾羌適麻木爾與和闐逸賊糾黨二百人圖南竄長祐遣陶生林捕得之俘帕夏妻女並其子引上胡里邁底胡里暨兩少子三孫磔金相印馬元于小虎麻木爾於市誅大小頭目一千六十六人全疆悉平四年春正月捷

聞得

旨褒嘉左宗棠由一等伯晉二等侯三品京堂劉錦棠由騎都尉

世職晉二等男其餘諸將賜獎有差是時官軍捕擒餘匪於葉爾羌諸處凡獲西域各國人錦棠悉宥勿誅深以白彥虎逆黨竄俄爲俄人阻遮爲恨激勵諸將分道窮追宗棠奏入

詔總理各國王大臣與俄國使臣理論五月金順派提督殷華亭

赴俄國古鏡台地言伊犁事俱詳載交涉志俄人既庇白逆復縱其黨孫義

合白老虎勾結土回四出劫掠伊犁各城尤爲匪藪官餉商貨屢

爲所奪防禦成阿披甲長春均以追賊陣亡逆燄愈張浸及南路

劉錦棠檄提督楊金龍協同追捕復飭羅長祐夏辛酉會布魯特

馬隊赴喀什噶爾邊境邀擊之九月壬子羅長祐偵賊竄索封口

乃疾驅據冲壳罕以待甲寅賊至官軍伏山谷以布魯特馬隊誘

之賊至伏起盡殲其衆斬賊目金山黑振江孫金彪擒馬良會等

誅之賊蓋詐領俄貿易票以入境爲亂者宗棠

奏請以所獲俄票知照俄使十月己丑安夷阿里達什糾衆入寇

初阿里達什敗竄俄境與其黨奉迭位什罕爲條勒勾結布魯特



頭目阿布都勒哈瑪及其子買賣提斯拉木等謀襲喀什辛亥至  
玉都巴什遣黨赴塔什密里克糾衆分兵入烏帕爾之瑪雜爾誦  
經散食瑪雜爾者回衆之祖墓也錦棠聞警檄張俊進兵塔什密  
里克自將兵趨烏帕爾壬辰追賊於玉都巴什賊合衆以抗錦棠  
麾軍進勢如潮湧賊皆久戰悍黨持西洋槍礮密如排筍彈丸浙  
浙雨注賊目一人執繡旗麾衆夏辛酉怒馬獨出直前刺之賊方  
錯愕而矛鋒已出於背立踣馬下辛酉奪其旗而舞大呼曰賊衆  
敗矣諸軍呼噪乘之賊大潰官軍追殺尸藉於途賊竄入南山至  
左曼回目庫彌什聚殲之蓋葉爾羌卡外布魯特陰受錦棠檄助  
勦者也擒阿里達什及所佩玉印以獻阿布都勒哈瑪父子逃入  
俄境謀再舉說安集延酋愛克木汗條勒及其弟阿希木汗條勒  
爲阿古柏復仇愛克木汗條勒皆回部叛酋張格爾之從孫也狡  
悍有部衆允助之並誘脅布魯特各部千餘人自烏魯克恰提取  
道卡浪圭入明瑤路官軍扼守不得進十二月癸卯繞竄畢勒套

格依五年春正月乙巳朔阿逆南趨博斯塘特勒克其地左右峻嶺綿亙中爲廣谷饒水草出谷東南爲烏魯阿提外卡有小徑通色勒庫爾又東至塔什密里克出谷之東爲烏帕爾偏南卽至都巴什地皆戈壁谷西北則阿依阿提冉三百餘里爲黑子拉提達坂與俄屬惡來相接賊利其地四通而前阻戈壁可以瞭官軍出沒復脅希布察克野回以厚兵勢錦棠慮官軍前進易爲賊窺乃設間誘賊深入伏兵山谷以待辛亥賊遊騎至烏帕拉特錦棠偵知賊後隊尙二千餘衆檄張俊趨烏魯阿提董福祥率輕騎趨胡素魯克以俟賊來得隙則徑進畢勒套格依扼其歸路癸丑錦棠趨烏帕爾賊謀來襲羅長祐由間道徑搗其巢夜三鼓銜枚疾馳至則賊酣睡盡殺之賊之來襲者平明至烏帕爾伏兵谷中以百騎來犯劉必勝何俊禦之賊稍卻伏兵出爲所圍段伯溪張復良以大軍來援賊乃退還甲寅賊至博斯塘谷口羅長祐設伏谷中譚慎典陣谷外賊瞥見分騎爲四十餘團團四十騎聯貫前進爲

長蛇之勢槍礮連環不斷其勢甚張羅長祜率馬隊持矛而入直衝中堅分賊陣爲兩賊首尾不能顧楊金龍方友升復左右蹴之賊衆狂竄入谷伏兵四起擒斬買提和卓及阿希木汗條勒惟愛克木汗條勒與阿逆以百餘騎遁入俄境是役也戰最烈陣亡總兵李青雲等十八員奏入

上嘉劉錦棠功頒賞珍物將弁賜獎有差陣亡各員皆賜卹愛克

木汗條勒及阿逆至俄爲所逐謀盜據邊城並乞安集延布魯特

諸回助之六月

擬定新疆記作六月乙未案五年六月無乙未日

竄至烏魯克恰提渡河而南錦棠策

賊南竄必出烏帕爾西南必出色勒庫爾檄羅長祜築壘烏帕爾

扼之分飭沿邊各布魯特徙帳內地爲堅壁清野之計自按兵喀

什俟賊深入求糧而後殲之七月丁亥賊踰嶺南竄色勒庫爾阿

奇木阿布都勒哈山出屯蘇巴什留伯克夏素唐居守辛卯賊繞

道薄城下夏素唐詐降誘賊阿逆信之至城下夏素唐預選死士

豁罕以待甫相見玉子巴什蘇乃滿突前挽其韁阿逆覺斫蘇乃



滿斷其指而逸豁罕以槍殪之復入城守賊忿甚圍攻益急錦棠自將赴援八月甲辰錦棠至勒的克賊解圍北走癸卯竄布倫可丙午董福祥兼程進追戊申至空台根滿斯遇賊騎教十奔向木吉去董福祥見賊所食牛羊血殷地知去未遠選健卒乘驟隨馬以追及賊於木吉賊背山阻河列隊以待夏辛酉從左方友升從右直前渡河擊之賊衆敗走奔里許鳴角返旆來戰勢甚悍夏辛酉方友升分兵兩路抄其後張俊率馬隊直貫其陣賊見去路斷遂大崩潰死者枕藉庚戌追賊至黑子拉提達坂賊僅數十騎復遁入俄境乃止是役也以數晝夜馳逐八百餘里師行所經率負荒人跡不到之區石壁冰梯上插霄漢鳥道陡絕立不並足猱升蛇伏而過又山嵐毒瘴中者立仆而糧駝戰馬墮澗墜巖及疲勞以斃者不可勝數蓋亦極用兵以來窮絕險厄不堪之惡境矣沿邊布魯特見之皆悚息聽命不敢動時俄人猶未歸我伊犁宗棠因自請出屯哈密以圖規復六年春正月

詔劉錦棠幫辦軍務二月宗棠分兵三路以趨伊犁飭金順自精河進以卓勝軍益之張曜自阿克蘇進增募皖勇千人並檄土爾扈特馬隊及湘軍二千五百人益之劉錦棠率所部馬步各營自烏什進譚上連譚拔萃陶鼎金王福田屯喀什阿克蘇哈密各處爲後援四月乙卯宗棠發肅州昇輓以行五月乙亥抵哈密俄人聞之增兵守伊犁七月

詔左宗棠入京備顧問劉錦棠署欽差大臣八月錦棠至哈密宗棠道甘陝赴京七年春二月俄人歸我伊犁

涉載交志

八年春譚鍾麟

劉錦棠奏設新疆行省

詔允之乃開郡縣制田賦興養立教民氣大和越十四年關內叛回劉四伏竄擾新疆收其餘衆置諸羅布淖爾自時厥後其黨逃散徧天山南北十年以來河湟之回歲出關者踵接於道漢纏之衆慄慄睨視如臨大敵而俄人自遼東戰敗以後其處心積慮以謀我新疆者蓋日加劇焉易曰履霜堅冰至元曰赤臭播關大君

不閑克國乘家則辨之不可不早辨也